

ಅನ್ನನ ತುದಾಚಿತ್

(ಕೊಡವ ಶವನ ಗೂಡ್)

ಬಡಕಡಮ್ಮಂಡ ಕಸ್ತೂರಿ ಗೋವಿಂದಮ್ಮಯ್ಯ



ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ
ಮಡಿಕೇರಿ

ಅವ್ಯನ ತುದ್‌ಚಿತ್

(ಕೊಡವ ಕವನ ಗೂಡ್)

ಎಳೆದೊನವು

ಬಡಕಡಮ್ಮಂಡ ಕಸ್ತೂರಿ ಗೋವಿಂದಮ್ಮಯ್ಯ



ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ
ಮಡಿಕೇರಿ

AVVANA TUDCHAD: A Collection of Kodava Poems
composed by Smt. Badakadammanda Kasturi
Govindamayya, published by the Karnataka Kodava
Sahithya Academy, Madikeri during 2006.

ಕ್ರಯ : ಇರ್‌ವದ್ ಉರ್‌ಪಿಯ

Price : Rs. 20-00

ಎಲ್ಲಾ ಹಕ್ಕುಗಳ ಕಾತ್ ಬೆಚ್ಚಿತ್

All rights reserved

ಪ್ರಕಟಣೆ ಸಮಿತಿ:

ಶ್ರೀಮತಿ ಉಳ್ಳಿಯಡ ಡಾಟಿ ಪೂವಯ್ಯ (ಅಧ್ಯಕ್ಷಿಣಿ)

ಶ್ರೀ ಮುದ್ದಿಯಡ ಕುಶ ಪೊನ್ನಪ್ಪ (ಸದಸ್ಯ)

ಶ್ರೀಮತಿ ತೀತಿರ ರೇಖಾ ವಸಂತ (ಸದಸ್ಯ)

ಶ್ರೀಮತಿ ಪಾಲೆರ ರಾಣಿ ಅಪ್ಪಣ್ಣ (ಸದಸ್ಯ)

ಬೊಳಿ ಪಡ್‌ತ್‌ನವು :

ರಿಬೆಸ್ಪಾರ್, ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ

ಸೌಟ್ ಭವನ

ಮ್ಯಾನ್ಸ್ ಕಾಂಪೌಂಡ್

ಮಡಿಕೇರಿ - 571 201

(ಫೋನ್ : 08272 229074)

ರಕ್ಷೆಪಾಳೆ ವಿನ್ಯಾಸ :

ಮಣವಟ್ಟಿರ ವಿದ್ಯ ಅಶೋಕ್

ಅಚ್ಚಾರ

: ಶಕ್ತಿ ಪ್ರಿಂಟರ್ಸ್

ಕೈಗಾರಿಕಾ ಬಡಾವಣೆ, ಮಡಿಕೇರಿ - 571 201

ದೂ: 08272-228829, 228382

ಫ್ಯಾಕ್ಸ್ : 08272 228875

ಈಮೇಲ್ : shakti_kf@yahoo.com

ಅಧ್ಯಕ್ಷಾಂಡ ತರ್ಕ್

ಕೊಡವ ಕವನ, ಸಾಹಿತ್ಯತ್ ಏರ ಅಭಿಮಾನ ಬೆಚ್ಚೆಂಡ್ ಸಾಧನೆರ ಬಟ್ಟೆಲುಳ್ಳ ಶ್ರೀಮತಿ ಬಡಕಡಮ್ಮಂಡ ಕಸ್ತೂರಿ ಗೋವಿಂದಮ್ಮಯ್ಯಂಡ "ಅವ್ವನ ತುದ್‌ಚಿತ್" ಎಣ್ಣುವ ಕವನ ಪುಸ್ತಕತ್‌ನ ಕೊಡವ ಸಾಹಿತ್ಯ ಪ್ರಪಂಚಕ್ ಒಪ್ಪ್‌ಚಿಟ್ಟುಂಡುಂಡ್.

ಕೊಡವ ತರ್ಕ್‌ರ ಎಳ್ತಾರಕ್ ದುಂಬ ಅವಕಾಶ ಕೊಡ್‌ಕಂಡು, ಬೊಳಚೆರ ಬಟ್ಟೆಲುಳ್ಳ ಬೋರೆ ಭಾಷೆಕ್ ತೂಕಿ ನೋಟನಕ ಕೊಡವ ತರ್ಕ್‌ಲ್ ಸಾಹಿತ್ಯ ಬೊಳಚೆ ಪೋರವೇ ಪೋರ. ಸುಮಾರ್ ಕಾಲಕೆತ್ತನೆ ಕೊಡವ ತರ್ಕ್‌ರ ಎಳ್ತಾರಕ್ ತಂಗಡ ಎಳ್ತನ ಪೊರಬೂಕುವಕ್ ಅವಕಾಶ ಕಮ್ಮಿ ಇಂಜತ್. ಆಚೀಂಗಿ ಕಯಿಂಜ ಚೆನ್ನ ಕಾಲಕಿಪ್ಪರ ಕೊಡವ ಸಾಹಿತ್ಯ ಜಾಗೃತಿರ ಕಾರ್ಬಾರ್ ನಲ್ಲೋಣೆ ಆಯಂಡುಂಡ್. ಇಂದಿಕ್ಕ ಪತ್ರಿಕೆ, ಸಂಚಿಕೆ, ಸಂಘ, ಸಂಸ್ಥೆ, ಆಕಾಶವಾಣಿ, ದೂರದರ್ಶನ ಇನ್ನತ ಮಾಧ್ಯಮ, ಎಳ್ತಾರಕ್ ಒತ್ತಾಸೆ ಕೊಡ್‌ತಂಡುಂಡ್. ಎಲ್ಲಾರು ಇದ್‌ಂಡ ಪ್ರಯೋಜನ ಪಡಂದಕ ಕೊಡವ ಸಾಹಿತ್ಯ ಕ್ಷೇತ್ರತ್‌ನ ಬಲಪಡ್‌ತಲು.

ಏದೇ ತರತ್‌ರ ಸಾಹಿತ್ಯ ಸೃಷ್ಟಿ ಆನಕ ಅದ್‌ಲುಳ್ಳ ಗುಣಮಟ್ಟ ಮುಖ್ಯ. ಒರ್ ಅಂದಾಜ್‌ಲ್ ಎಣ್ಣುವದಾಚೀಂಗಿ ಕೊಡವ ಸಾಹಿತ್ಯ ಇಕ್ಕ ಬಲಕೂಡಿಯಂಡುಳ್ಳಾನಗುಂಡ್, ಏರ ತೋಪರೆಯೂ ಅಲ್ಲತ, ಏರ ಖನತ್‌ರದೂ ಅಲ್ಲತ ಮಧ್ಯವರ್ಗತ್‌ರ ಗುಣಮಟ್ಟ ಉಳ್ಳನ್ನತ ಎಳ್ತಕೂ ನಂಗ ಪ್ರೋತ್ಸಾಹ ಕೊಡ್‌ತಂಡುಂಡ್.

ಶ್ರೀಮತಿ ಕಸ್ತೂರಿ ಗೋವಿಂದಮ್ಮಯ್ಯ ಎಳೆದಾಡನ "ಅವ್ವನ ತುದ್‌ಚಿತ್" ಕವನ ಬುಕ್‌ಲಾ ಭಕ್ತಿ ಪಾಟ್, ನಮ್ಮೆ ನಾಳಾರ ವಿಶೇಷತೆ, ಸಮಾಜ ಬದ್‌ಕಾಲ್ ಕಾಂಬ ತರಾವರಿ ಗುಣ ಸ್ವಭಾವ, ನಲ್ಲಾಮೆ-ಕೆಟ್ಟಾಮೆನೆಲ್ಲ ತೊಟ್ಟಿತ್ ಚಾಯಿತ್ ಎಳೆದಿತ್. ಎಳೆಕರ್ತಿನುಂಡ್ ಪಲಬಗೆರ ಎಳೆ ಇಂಞಾ ಬರಡ್, ಕೊಡವ ಸಾಹಿತ್ಯ ಬೊಳಿಯಡ್- ಉಳಿಯಡ್.

ಉಳಿಯಡ ಡಾಟಿ ಪೂವಯ್ಯ

ಅಧ್ಯಕ್ಷಿಣಿ

ಮಡಿಕೇರಿ

ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ

ಒಳ ಪಾಠೆಲ್

1.	ಅವ್ವನ ತುದ್‌ಚಿತ್	1
2.	ಕಳ್ಳ ಕೃಷ್ಣ	2
3.	ಅಮ್ಮಂಗ	3
4.	ಜಾತಿರ ಭೂತ	5
5.	ಮಾತೆ ಶಾರದೆ	7
6.	ನಡ್‌ಂದ ಬಟ್ಟೆ	9
7.	ನೆತ್ತಿರ ಎಳೆತ್	11
8.	ವಿಧಿ	13
9.	ಚುಟ್‌ಕ್	15
10.	ರಾಜಕಾರಣ	16
11.	ಪೆತ್ತವ್ವ	18
12.	ನಾಡ ಕೊರವುಕಾರ	20
13.	ಸುಬ್ರಹ್ಮಣ್ಯ	22
14.	ಕೊಡಗ್ ನಾಡ್	25
15.	ಪುತ್ತರಿ	27
16.	ಫೀ. ಮಾ. ಕಾರ್ಯಪ್ಪ	29
17.	ಬಂಬ	31
18.	ಪತಿವೃತೆ	33
19.	ತಂಗೆ ಕುಣಿಕ್	35
20.	ಬಾಳ್	37
21.	ತೀರ್ಥಕುಳಿ	38
22.	ಕೊದಿ ಮೈಮ	40
23.	ಕಣಿತೊಪ್ಪ	41

ಎಳ್ಳೊಕರ್ತೃರ ತರ್ಕ್ಕೊ

ಇದ್ ನಾಡ ಆದ್ಯ ಪುಸ್ತಕ. ಕವನ, ವೈಚಾರಿಕ ಲೇಖನ ಎಳ್ಳೊದ್ವಕ್ ಆಸಕ್ತಿ ನಾಕ್. ನಾನ್ ಹೈಸ್ಕೂಲ್ ಓದಿಯಂಡಿಪ್ಪಕ "ಪ್ರಜಾಮತ" ಪುಸ್ತಕಕ್ "ಓ ನನ್ನ ಸಹೋದರಿಯರೇ, ಕಾಂಚನ ಪಿಶಾಚಿಗಳನ್ನು ಮದುವೆ ಯಾಗಬೇಡಿ" ಎಣ್ಣೊವ ಒರ್ ಲೇಖನ ಎಳ್ಳೊದಿತ್, ಅದ್ 1956ಲ್ ಪ್ರಕಟ ಆಚಿ. ಅಲ್ಲಿಂಜ ಒಂದೋ, ದಂದೋ ಕವನ ಎಳ್ಳೊದ್ವನ್ದ್ ಗೇನ.

ಚೆರಿಯ ಬಯತ್ಲಾ ಅಪ್ಪನ ಕಳಂದಂಡ್, ಬದ್ಕಲ್ ಕಷ್ಟತಾಲೇ ಬೊಳಂದಿತ್ ಬಂದ ನಾಡ ಎಳ್ಳೊತರ್ ಶಕ್ತಿ ಕುಗ್ಗಿ ಪೋಚಿ. ಓದ್, ಕೆಲಸ, ಮಂಗಲ, ಸಂಸಾರ ಇದ್ಂಡೆಲ್ಲಾ ಎಡೆಲ್ ನಾಡ ಎಳ್ಳೊತರ್ ಶಕ್ತಿ ಮರೆಯಾಚಿ.

"ಕೊಡಗು ಲೇಖಕರ ಮತ್ತು ಕಲಾವಿದರ ಬಳಗ"ತ್ತರ್ ಸದಸ್ಯೆ ಆನದು ಎಳ್ಳೊದಂಡು ಎಣ್ಣೊವ ಪುರ್ಡ್ ಜಾಸ್ತಿ ಆಚಿ. ಚೆರಿ ಚೆರಿಯ ಕವನ ನಾಡ ಆದ್ಯ ಎಳ್ಳೊತ್. ಆಚೆಂಗಿ ಪುಸ್ತಕ ರೂಪತ್ ಕೊಂಡ್ ಬಕ್ಕಂಡುದೆಣ್ಣುವ ಕ್ಯಾಯಿತ್ ಪ್ರಯತ್ನ ಪಟ್ಟ. ಅಪಾಲೇಂದ್ ಗೊತ್ತಾಪದು ಮುಂಡತಾನ. ಇಕ್ಕ ಕೊಡವ ಸಾಹಿತ್ಯ ಅಕಾಡೆಮಿ ಸಂಪರ್ಕ ಜಾಸ್ತಿಯಾನದು, ಇಕ್ಕತ್ತರ್ ಅಧ್ಯಕ್ಷಿಣಿ ಉಳ್ಳಿಯಡ ಡಾಟಿ ಪೂವಯ್ಯ ಅಯಿಂಗಡ ಪ್ರೋತ್ಸಾಹತ್ ತರ್ಕ್ಕೊನಗುಂಡ್ ಎಳ್ಳೊದುವಕ್ ಮಿಂಞಾಕ್ ಬಂದ. ನಾಡ ಸಾಹಿತ್ಯ ಸೇವೆಕ್ ಒತ್ತಾಸೆ ತಂದ ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿಕೊ, ಓದುವ ಅಭಿಮಾನಿಯಕೊ ನಾನ್ ಮನದುಂಬ್ನ ವಂದನೆನ ಒಪ್ಪೊಚಿಟ್ಟಿವಿ.

ಬಡಕಮ್ಮಂಡ ಕಸ್ತೂರಿ ಗೋವಿಂದಮಯ್ಯ
ಮಡಿಕೇರಿ

ಅವ್ಯನ ತುಡ್ಚಿತ್

ಆದಿಶಕ್ತಿಯುನೀ | ಅಂಬಿಕೆಯುನೀ | ಸುಖಮಾಡ್ ಈ ಜಗಕ್ |
ಪಾರ್ವತಿಯು ನೀ | ಸರಸ್ವತಿಯು ನೀ | ದಕ್ಷಿಣಗಂಗೆಯು ನೀ ||

ಭಕ್ತಿಲ್ ನಿನ್ನ | ತುಡ್ಚಯಂಗಕ್ ನೀ | ಮುಕ್ತಿನ ಕೊಡ್ತಿತ್ |
ಎಕ್ಕಲು ನೀಡ | ಗೇನತೆ ಬದ್ಕುವ | ಬಟ್ಟೆನ ಕಾಟಿತ್ |

ಮಕ್ಕಡ ತಪ್ಪುನ | ಕಂಡಿತ್ ನೀನ್ | ಮೌನತ್ ಅಳಕತೆ |
ತಪ್ಪನ ತಿದ್ದಿತ್ | ಒಪ್ಪ್ ಮಾಡಿತ್ | ಬಟ್ಟೆನ ಕಾಟಂಡು ||

ಕೊದಿ ಪೋಲೆ ಚಾಕಿತ್ | ನೆಮ್ಮದಿ ತಂದಿತ್ |
ನಂಗಲ ಪೊಲತಂಡು ನೀನ್ ||

ನಿನ್ನ ತೊತ್ತಿತ್ | ಮುಂಜಿ ಕುಳ್ಚಿತ್ | ಪಾಪತನ ಕಳ್ಂದ್ |
ನೀಡ ಕೇಳಿನ | ಕೇಟಿತ್ ನಂಗ | ನಿನ್ನ ಕೊಂಡಾಡ್ಚಿ | ಅವ್ವ ನಿನ್ನ ಕೊಂಡಾಡ್ಚಿ |

ಅವ್ವನಾಯಿತ್ | ಬದ್ಕಲ್ ನಂಗಡ | ಚಾಕಿ ಪೊಲತಂಡು |
ಭಕ್ತಿಲ್ ಬೋಡ್ವ | ನೆಮ್ಮದಿ ತಂದಿತ್ | ಪೊಲತಿತ್ ಕಾಪಾಡ್ ||

ಕಳ್ಳ ಕೃಷ್ಣ

ಅಮ್ಮಾ ನಾನ್ | ದೇವಡಾಣೆ | ಕಟ್ಟಿತ್ತಿಲ್ಲೆ ಬೊಣ್ಣೆನೆಯಿ |
ಎಲ್ಲಾ ಕೂಡಿ ನಾಡಬಾಯಿಕ್ | ಬೊಣ್ಣೆನೆಯಿನಾ ಮತ್ತಾಚಿ|

ಬೊಣ್ಣೆ ನೆಯಿರ ಕುಡ್ಕೆ ನೋಟ್ | ಉದಿಲೆ ತ್ಯೂಂಗ್ಯಂಡ್ ಉಂಡಮ್ಮಾ |
ಅಚ್ಚಕೆತ್ತರ ಉದಿಕ್ ಕೈಯಿಟ್ | ನೆಯಿ ಎಡ್ಪಕ್ ಕಯ್ಯಮ್ಮಾ |

ಪೊಟ್ಟಾ ತಕ್ಕ ಪರಂದಿತ್ | ನನ್ನ ಕಳ್ಳಂದೆಣ್ಣಾಚಿ
ಗೋಪಿ ಪೊಂಗ ಎಲ್ಲಾ ಕೂಡಿತ್ | ನನ್ನ ಗೋಳ್ ಕೆಟ್ಟಾಚಿ

ಮೆತ್ತಿತಿಂಜ ನೆಯಿನ | ಕೈಯಿಲ್ ತೇಟಿತ್ ಎಡ್ತನಾ
ಕೈಯಿಕ್ ಪತ್ತಾನ | ನೆಯಿನ ಕಂಡಿತ್ | ನನ್ನ ನೀನ್ ಪೊಯ್ಯತೆ ||ಅಮ್ಮಾ||

ಚೇಷ್ಟೆ ಕಳಿ ನಾನ್ ಕಳ್ಳಚಕಲೂ | ಕೆಟ್ಟ ಬುದ್ಧಿ ನಾಕಿಲ್ಲೆ |
ಎಂತ ಕಟ್ಟಿತ್ ತಿಂಬದಾಚೇಂಗ್ಯೂ | ಒಬ್ಬನೇ ನಾನ್ ತಿಂಬಾಲೆ ||

ಗೋಪಿ ಪೊಂಗ ನಾಡ ಜೊತೆಲ್ | ಚೇಷ್ಟೆ ಕಳಿನ ಕಳಿಪಲಾ |
ನಾಡ ಎಲ್ಲಾ ಚೇಷ್ಟೆ ಕಳಿಕ್ | ಅಯಿಂಗಳೇ ಆದ್ಯ ಕಾರಣ ||ಅಮ್ಮಾ||

ಶ್ಯಾಮಂಡ ತಕ್ಕ ಕೇಟವ್ವ | ಪೊಯ್ಯುವಕ್ ಕೈ ನೇತಾಚಿ |
ನೇತಾನ ಕೈನ ಕ್ಕದಕಾಟ್ಟಿತ್ | ತಬ್ಬಿ ಕೊದಾಚತ ಶ್ಯಾಮನ ||

ಅಪ್ಪುಂಗ

ಅಿವ್ವಾ | ನೀಡ ಕೇಳಿ ಕೀರ್ತಿನ ಏದ್ ತರತ್ ಕೊಂಡಾಡಡ್ |
ಲೋಕಜನತಾನ ನಂದ್ ಮಾಡ್ವಕ್ ಭೂಮಿಕ್ ನೀ ಬಂದಿಯ |

ಬ್ರಹ್ಮಗಿರಿರ ಚಾಯಿಕಂಡಿತ್ ಅಲ್ಲಿ ತಪಸ್ಕ್ ಅಳ್ತಿಯ
ನೀಡ ಚಾಯಿನ ಕೊದ್ಚಿ ಋಷಿಯು ನಿನ್ನ ಮಂಗಲ ಕೈಚತ್ ||

ಅಗಸ್ತ್ಯ ಋಷಿನ ಮಂಗಲಾಯಿತ್ ಒಕ್ಕಾಮೆನ ನಡತಿಯ
ತಂದ ತಕ್ಕಕ್ ತಪ್ಪಿನಡೊಂದಾಂಗ್ ಋಷಿರ ಚೊಕ್ಕನ ತಳ್ತಿಯಾ|
ಋಷಿಡ ಚೆಡಿನ ಕೂಟಾಕತೆ ನೀ ಪೊಳೆಯಾಯಿತ್ ಪರಂಜಿಯಾ
"ಲೋಕೋದ್ಧಾರವೇ" ಬದ್ಕಂದೆಣ್ಣುವ ಗುರಿನ ಮಾಡಿತ್ಕಾಟಿಯ ||೨||

ಸತ್ಯ, ನ್ಯಾಯ, ನೀತಿ, ಬದ್ಕರ ಮೂಲಾಂದೆಣ್ಣುವ ತಕ್ಕನ
ಮಕ್ಕಕೆಣ್ಣಿತ್ ಬದ್ಕಿ ಬಾವಳ ಬಟ್ಟೆನಾ ನೀ ಕಾಟಿಯ|
ಬುದ್ಧಿ ತಕ್ಕನ ಮನತ್ ನೆನತಿತ್ ಸತ್ಯಪರಂದತ್ ಅಂದಾಲ
ಪರಂದ ನ್ಯಾಯಕ್ ಋಷಿಡ ಶಾಪವು ಕೊಂದ್ ಬೆಚ್ಚಿತ್ ಅಂದಾಲ ||೩||

ಉಂಬ ತಿಂಬಕ್ ಬದ್ಕಿ ಬಾವಕ್ ಕೊರು ಆಯಂಡ್ ಬಾತ್ಲ
ಜಾತಿ ಪೋಯಿತ್ ನೀತಿ ಕಳಂದಂಡ್ ಬುದ್ಧಿಯು ಮಂಕಾಚಿಲ
ಮಂದ್ ಮಾನಿಲ್ ಬೆಂದು ಚಾಚಲೆ ಕುಂದಿಪೋನವು ನಂಗಲ
ಪೂಜಾ ಕಾರ್ಯವೂ, ಪೌರೋಹಿತ್ಯ ಕೈ ತಪ್ಪಿಪೋಚಿಲಾ ||೪||

ಜಾತಿ ಭ್ರಷ್ಟಂಗಲಾನ ನಂಗಲ ಕಂಡ್ ನೀನ್ ಕೊರಗಿಯಾ
ನಾಡ ಮಣ್ಣಾಲ್ ನಿಂಗ ಎಕ್ಕಲೂ ಒಕ್ಕಾಯಿತ್ ಬದ್ಕೀಂದ್
ತಂಪ್ ತಕ್ಕನ ಕೇಟ ಮಕ್ಕಡ ಮನಕ್ ನೆಮ್ಮದಿ ಕ್ಷಾಚಿ
ತುದ್ಚಿ ಅವ್ವನ ಕೊಂಡಾಡ್ವ ಅಮ್ಮಂಗ ನಂಗಾಚಿಲಾ|

ಪಣಕಾಸ್ ಉಂಬ ತಿಂಬಕ್ ಕೊರು ನಂಗಕ್ ಆಚೇಂಗ್ನೂ
ತಣಪ್ತಕ್ಕಾರ ಅವ್ವಂಡ ಕೊದಿ ಬದ್ಕಬಟ್ಟೆ ಕಾಟ್ಚಿ|
ಕಲ್ಲಕಾವೇರಿ ಪಿಲ್ಲಭೂಮಿಲ್ ನಂಗಲೂ ನಂದಾಯಿತ್
ತಂಪ್ ತಕ್ಕಾರ ಗೇನ ಅವ್ವಂಡ ಬದ್ಕ ನೆಮ್ಮದಿಕಾಚಿಲ|

ಚಾತಿರ ಭೂತ

ಚಾತಿಂದ್ ಎಣ್ಣಾವ ಭೂತತನ
ಬೊಳತವಕಾಗ ನಂಗೆಲ್ಲಾ|
ಚಾತಿ ಭೂತತ ಕಣ್ಂಜಿ ಪೋನಕ
ದೇಶನಾಶಕ್ ಹೇತುವು||
ಪುಟ್ಟಿ ಬಪ್ಪಕ ಚಾತಿ ಇಪ್ಪಾಲೆ
ದೇವ ಮಕ್ಕ ಎಲ್ಲಾರು|

ಚಟ್ಟು ಪತ್ತ್ಕ ಚಾತಿ ಕೇಪಾಲೆ
ಶಿವಂಡ ಪಾದಕ್ ಕೂಡ್ನವು|
ಭೂಮಿತಾಯಿಕ್ ಚಾತಿ ಇಲ್ಲೆ
ಮಕ್ಕ ಮಾತ್ರ ಎಕ್ಕಲು|
ಚಾತಿ ಚಾತಿಂದೆಣ್ಣೆಬುದ್ಧಂಡ್
ಚೆಡಿರ ಕುರುನ ಬೊಳತವದಾ ||

ಬೀಜ್ಯ ಕಾತ್‌ರ ರಭಸಕಿಲ್ಲೆ
ಉಕ್ಕಿ ಪರಿಯುವ ಪೊಳೆಕು ಇಲ್ಲೆ
ಬೊಳಿಕಾಟ್‌ವ ಸೂರ್ಯಂಗಿಲ್ಲೆ
ತಂಪು ತಪ್ಪ ಚಂದ್ರಗಿಲ್ಲೆ
ಈ ಜಾತಿದೆಣ್ಣೆವ ಭೂತ ||

ಸ್ನೇಹಾಚಾರಕ್ ಅಡ್ಡ ಬಪ್ಪಾಲೆ,
ತಿಂಬ ಕುಡಿಪಕ್ ಬಂದ್‌ನಿಪ್ಪಾಲೆ,
ನಮ್ಮೆ ನಾಳ್‌ಲ ಜಾತಿಕೇಪಾಲೆ
ಚತ್ತ ಪೆತ್ತಾಂಗ್ ಜಾತಿ ಬಪ್ಪಾಲೆ
ಕೂಡಿ ಬದ್‌ಕ್ಕಕ್ ಜಾತಿ ಕೇಪಾಲೆ|

ಕೋಮ್‌ಗಲಬೆಕ್ ಮೂಲಕಾರಣ
ಪೊಯ್ತಕಳಿಕೂ ಇದೇ ಕಾರಣ
ಕೆತ್‌ಕೊಲೆಲ್ ಕಾಂಗು ಈ ಗುಣ
ಚೋರೆ ತುಳಿ ತುಳಿ ದುಂಬಿ ದುರ್ಗುಣ
ದೇಶನಾಶಕ್ ಮೂಲ ಆನದ್
ಭೂತ ಪೊದ್‌ನ ಈ ಗುಣ || ಜಾತಿಂದ್ ||

ಮಾತೆ ಶಾರದೆ

ಮಾತೆ ಶಾರದೆ | ನೀಡ ಕೇಳಿನ | ಎನ್ನನೆ ನಾ ತುದಿಕಡ್ |
ಲೋಕ ಜನಕೆಲ್ಲಾ | ಅವ್ವನಾಯಿತ್ | ಚಾಕಿ ಪೊಲತಿಯ ಎಂಗಳಾ ನೀ ||
ಅಪ್ಪಡಂವ್ವಡ ಕೊದಿ ಕುಳ್ಳಿ | ನೀನಾಯಿತ್ ಪುಟ್ಟಿಯಾ |
ಚೆರಿಯ ಬಯತ್ಲೇ | ಕಷ್ಟ ಸುಖಿ ಎಲ್ಲಾ ನೀನ್ ಬದ್‌ಕ್‌ಲ್ ಅರಿಂಜಿಯ |
ಅಂಜಿ ಬಯತ್‌ಕ್ ಪರಮ ಹಂಸಡ ಕೂಡೆ ಮಂಗಲ ಕೈಯಿಂಜಿತ್ |
ಮಕ್ಕ ಕಳಿ ನೀ ಕಳ್‌ಚಂಡೇ | ಒಕ್ಕ ಕೀರ್ತಿನ ಬೊಳತಿಯ ||ಮಾತೆ||
ಪುಚ್ಚಿ ಪುಡ್‌ಚವ ನೀಡ ಒಡಿಯಂದೆಣ್ಣೆಪರ್‌ಂದ ತಕ್ಕನ
ಕೇಟ್ ಮನತ್ ಕೊರಗಿಯಂಡೆ, ಅಯಿಂಡ ಸೇವೆನ ಮಾಡಿ |
ದುಃಖಿತುಳ್ಳ ಜನಳ ಕಂಡಿತ್ | ಕಣ್ಣೋನೀರ್ ಇಟ್ಟಿತ್
ಕಷ್ಟ ಕಂಡಿತ್ | ಕರಿ ಪೋಯಿತ್ | ಸಹಾಯ ಅಯಿಂಗಕ್ ಮಾಡಿಯ ||
ನೀನ್ ಮಕ್ಕಳ ಪೆರತ ಪೋಚೇಂಗಿಯೂ | ಲೋಕ ಜನಕೆಲ್ಲಾ ಅವ್ವನೇ
"ಜಗನ್ಮಾತೆ" ಎಣ್ಣಾವ ಕೇಳಿಲ್, ಲೋಕ ಮಕ್ಕಳ ಚಾಕಿತ್
ಶಿಷ್ಯಂಗಕೆಲ್ಲಾ ಬಟ್ಟೆ ಕಾಟಿತ್ | ಬದ್‌ಕ್ ಉದ್ಧಾರ ಮಾಡಿತ್
ವಡಿಯ ಬುಟ್ಟ್ ಪೋನ ಬಟ್ಟೆಕ್ | ಸೂತ್ರಧಾರಿಣಿ ಆಯಿತ್ ||ಮಾತೆ||

ತಾಳ್ಮೆ, ಸಹನೆ, ಪ್ರೀತಿ, ನೀತಿರ ಬಟ್ಟೆ ಮಕ್ಕಕ್ ಕಾಟಿತ್ |
ತಗ್ಗಿ ಬಗ್ಗಿತ್ ನಡಂದತೇಂಗಿ| ಒಕ್ಕ ಉದ್ದಾರಂದೆಣ್ಣಿತ್ |
ಮೂಡಿ ಕುಂಞಿಯ ಎಕ್ಕಲೂ| ಮಣ್ಣಾಮನೆರ ಕೇಳಿನ
ಕೊದಾಚಿ ಬದಾಕ್ ಮಾಡಾಚೇಂಗಿ | ಒಕ್ಕ ನೆಮ್ಮದಿ ಕಾಂಬಲ||

ಎಣ್ಣುವ ತಕ್ಕಾನ ಮಾಡಿಕಾಟಾನ ಮಹಾ ಮಾತೆ ಶಾರದೆ
ನೀಡ ಬದಾಕ್ ಮೂಡಿ ಮಕ್ಕಕ್ ಬಟ್ಟೆ ಕಾಟಡಂದೆಣ್ಣಿತ್
ನಿನ್ನ ಬೋಡಿಯಂಡ್, ನೀಡ ಗೇನತ್, ನಿನ್ನ ತುದಾಚಂಡ್
ಬದಾಕುವ ||ಮಾತೆ||

ನಡಂದ ಬಟ್ಟೆ

ಮರಕತೇ ನೀ ಮರಕತೇ ನಡಂದ್ ಬಂದ ಬಟ್ಟೆನಾ|
ನಡಂದ ಬಟ್ಟೆನ | ಮರಂದ್ ಪೋನಕ | ಬದ್‌ಕ್ ಅಡಿಕೊಡಿ ಆಕುಲಾ||
ಬದ್‌ಕ್‌ಂದೆಣ್ಬದ್ ನಂಗ ಗೇನ ಮಾಡ್‌ನನಕೆ ಆಪಾಲೆ
ಬದ್‌ಕ್ ಬಟ್ಟೆಲ್ ಕಷ್ಟ ಸುಖವು ಎಡೆಮೇಂಗಿತ್ ಬಪ್ಪಕ
ಕಷ್ಟ ಬಪ್ಪಕ ಎಲ್ಲರೂ ಹಣೆ ಬರತಾನ ಬಯ್ಯುವ
ನಾಡ ಸತ್ಯ ಧರ್ಮತಾನಗುಂಡ್ ಸುಖವು ಬಾತ್‌ಂದ್ ಪರೆಯುವ||

ಇಂದ್ ಬಪ್ಪ ಎಲ್ಲಾ ಕಷ್ಟಕೂ ಕೈಯಿಂಜ ಜನ್ಮವೇ ಕಾರಣ
ಕಾಂಗತುಳ್ಳ ಕೈಯಿಂಜ ಜನ್ಮವು ಬಾಯಿ ಮುಚ್ಚಿತ್ ಇಪ್ಪಕ,
ನಂಗ ಎನ್ನನೆ ಪರಂದತೇಂಗ್ಯೂ, ಮೌನತಳತಿತ್ ತೆಳುಚಂಡ್
ಕಾಂಗತುಳ್ಳ ಕೈರ ಒಳ್‌ಲಾ ಕೈ ಗೊಂಬೆಯಳಾಯಿತ್ ||೨||

ಸುಖವೆ ಎಕ್ಕಲೂ ಬೋಂಡುಂದೆಣ್ಣಿ ಎಂತ ಕೆಲಸಕೂ ಹೇಸತೆ,
ಸುಖಿತ್‌ರ ನೆಯಿ ತಡಿಲ್ ದುಂಬಿತ್ ಕಣ್ಣ್ ಕಾಂಗತೆ ಆಪಕ
ಹೊಗಳಿಕೆಕೂ, ತೆಗಳಿಕೆಕೂ ವ್ಯತ್ಯಾಸವೇ ಅರಿವಕಯ್ಯತೆ
ಇರ್‌ಳ್ ಕಂಡ ಕುಂಡ್‌ಕ್ ಪೋಲ್ ಬುದ್ಧಿತ್ ಚೋಪಕ ||೩||

ಪಣ ದುಂಬಿತ್ ಸುಖಿತ್ ಬದ್‌ಕ್ವಕ ಹೊಗಳಿಕೆರ ತಕ್ಕ್ ಪರೆವಕ,
ಬುದ್ಧಿ ತಿರುವಕ, ಕೊಬ್ಬ್ ಏರ್‌ವಕ, ಏದ್ ಒಂದೂ ಅರಿಯತೆ
ಮಾಡ್ವಕಾಗತ ಎಂತ ಕೆಲಸಕೂ ಮಿಂಞ ಬಯ್ಯ ನೋಟತೆ
ಚಿಕ್ಕಿ ಪೋಯಿತ್ ಚೊಕ್ಕ್ ಅಡಂಗ್ವಕ ತಪ್ಪ್ ನಂಗಡ ಅರಿವಕ||

ಅರ್‌ಂಜ ತಪ್ಪ್‌ನ ತಿದ್ದಿನಡಂದಕ ಬಾಳ್‌ಲ್ ಬೊಳಿ ಕ್‌ಟ್ವವಕ
ಪುಟ್ಟಿ ಬಂದದ್ ಸಾರ್ಥಕಾಚಿಂದೆಣ್ಣೆ ನೆಮ್ಮದಿ ಪಡೆಯಲು
ಮಣ್ಣ್ ಮನೆರ ಕೇಳಿ ಕೀರ್ತಿನ ಕೊಂಡಾಡ್ಯಂಡ್ ಬದ್‌ಕಲು
ಮರಕತೇ ನೀ ಮರಕತೆ ನಡಂದ್ ಬಂದ ಬಟ್ಟೆನಾ ||೫||

ನೆತ್ತಿರ ಏಳೋತ್

ಹಣೆ ಬರತ್ ಎಳೆದಾನ ಎಳೆತಾನ ದಾಕೂ ಒದ್ದಕ್ ಕೈಯ್ಯುಲೆ
ನಾಬೆರಗಲತ್ ಎಳೆದಾನ ಎಳೆತ್ ದಾರುಕೂ ಕಾಂಬಾಲೆ ||೨||
ಮೋಡಿ ಅಕ್ಷರ ಮೋಡಿ ಎಳೆತ್ ಓದ್ದಕ್ ದಾರುಕೂ ಗೊತ್ತಿಲ್ಲೆ
ತಿಕ್ಕಿ ತಿಕ್ಕಿ ಎಳೆದುವ ರೀತಿ ಅವಂಗೊಬ್ಬಂಗ್ ಮಾತ್ರ ಗೊತ್ತುಳ್ಳೆ ||೧||

ಜೀವನ ದುಂಬಾ ಸುಖವೇ ಕಾಂಬಕ ಎಲ್ಲಾರು ಅವನ ಕೊಂಡಾಡ್ವ
ಚೆರಿಯ ದುಃಖ ಬಪ್ಪಕ ನಂಗ ದೇವಡ ಲೀಲೇಂದ್ ಕೊರಗುವ |
ಕೇಳಿ ಕೀರ್ತಿ ದುಂಬಿಯಂಡ್ ಬಪ್ಪಕ ಪುಣ್ಯತ್ತಾರ ಫಲ ನಾಕೇಂದ್
ಕೈಯಿಂಜ ಜನ್ಮತ್ ಮಾಡ್ನ ನಲ್ಲಾಮೆಕ್ ಕಾಟ್ವನ ಫಲವೇಂದ್
ಕುಸಿಪಡುವ

ಕಷ್ಟವು ದುಃಖವು ಮೊಟ್ಟಾಕ್ ಮೊಟ್ಟಾಕ್ ಬಪ್ಪಕ ಬಟ್ಟೆಕಾಂಗತೆ,
ಕೆರೆಕ್ ಪಾರಿತೋ ಕೇರ್ ಇಟ್ಟಂಡೋ ಬದಾಕ್ನ ಅಂತ್ಯಮಾಡ್ಯವ,
ಆಳಣ್ಣ ತರತರ ತಕ್ಕಾಪರಂದಿತ್ ನಾವುರ ತೀಟೆ ತೀತಂಡ್
ಕೈಯಿಂಜ ಜನ್ಮತ್ ಮಾಡ್ನ ಪಾಪಕ್ ಅನ್ನನೇ ಆಂಡುದೆಣ್ಣಿತ್ ||೩||

ತಕ್ಕ ಪರವಕ ಆಳಣ್ಣ ಒರೋರ್ ಕಾರಣ ಕಂಡ್ ಪುಡ್ಚಿತ
 ಅಕ್ಕ ದಾರುಕೂ ಬ್ರಹ್ಮಂಡ ಎಳಾತ್ ಅಚ್ಚಕೆಂದೆಣ್ಣದ್ ಅರಿಯುಲೆ|
 ಬ್ರಹ್ಮಂಡ ಎಳಾತ್‌ನ ತಿಕ್ಕುವ ಕೆಲಸ ದಾರ್‌ನಗುಂಡು ಕೈಯುಲೆ
 ಕಾಂಗತೆ ಬ್ರಹ್ಮನ ಫಲತರ ರೀತಿಲ್ ಬೈವಕ್ ಮಾತ್ರ ಕೈವಲಾ ||೪||

"ಹಣೆಬರದೆಣ್ಣ"ವ ಪಟ್ಟಿನ ಕೆಟ್ಟಿತ ಮುಂಡತೆ ಅಳಪವುಂನಂಗೆಲ್ಲಾ
 ದೇವಡ ಇಚ್ಚೆನ ಮೀರಿತ್ ಬದ್‌ಕ್‌ವಕ್ ನಂಗಕ್ ದಾರುಕೂ ಕೈಯುಲೆ|
 ಏದೇ ವಿಷಯತ್ ಎನ್ನನೆ ಆಂಡು, ಅನ್ನನೆ ಆಪ ಬದ್‌ಕ್‌ಲ್|
 ಬ್ರಹ್ಮನು ಬಪ್ಪಾಲೆ, ಹಣೆ ಬರ ಪರಿಯತೆ ನಿಂತಿಪ್ಪ ||೫||

ಪಚ್ಚೆ ಮನತಾರ, ಪಚ್ಚೆ ತಕ್ಕನ ಪತ್ತಾಳಾರ ಕೂಡ ಪರಂದಂಡ್
 ಕಾಲ್, ಬಾಲ್ ಎಲ್ಲಾ ಕೂಟ್ಟಂಡ್ ತಾನೇ ಕಂಡಿತ ಬಂದನೆಕೆ,
 ಆರವು ಬೇರವು ಅರಿಯತೆ ಪೋಚೇಂಗ್ಗೂ ಪಚ್ಚಿಪರವದ್ ನಿಪ್ಪಾಲೆ
 ಫಲತರತ್, ತರತರ ಪರಂದಿತ, ನಾವುರ ಚಪಲ ತೇತವ ||೬||

ವಿಧಿ

ದಡ ದಡ ಕೊಟ್ಟಾನ ಪಡಿರ ಸದ್ಧಾಕ್
ಎದ್ದಿತ್ ಪಡಿತ್ತೊರಂದ ನಾನ್
ತೊರಂದ ಪಡಿರ ಮಿಂಞಲ್
ದಾರ್ನೊ ಕಾಂಗತೆ ಪಡಿ ಇಟ್ಟು |

ನಿಪ್ಪರ್ ಮೇಲೆ ಅಳತಿತ್ ದಾರೋ
ಕುಸುಕುಸಾಂದೆಣ್ಣೆ ತೆಳ್ಳಚನೆಕಾಚಿ|
ಎನ್ನಂಗ್ ಇನ್ನನೆಂದೆಣ್ಣೆತ್ ಮನತ್‌ಲೆ
ಲೆಕ್ಕಚಾರ ಮಾಡಿತ್ ನಿಂದ |

ಅಗ್ಗಾನಕ್ ಕೊಟ್ಟಾನ ಮನಸಾಕ್ ಮಾತ್ರ
ಸದ್ಧೂ ತೆಳಿಯು ಕೇಟಿತ್ ಪುನ ಪುನ |
ಮನತ್‌ಲೆ ದುಂಬಾನ ಪೋಡಿನಗುಂಡ್
ಬದ್‌ಕುವ ಆಸೆ ಇಂಗ್ಯಂಡ್ ಬಾತ್ ||

ಪೋಲು ಬೈಟು ದೇವಳ ತೊತ್ತಿತ್
ಬೋಡ್‌ನ ನಾನ್ ದಿನದಿನವು
ಕಷ್ಟ ಕಾಟತೆ ನೊಂಬಲ ತಕ್ಕತೆ
ಬದ್‌ಕಾರ ಅಂತ್ಯ ತಂದಾರ್ ನಾಕ್ ||

ಮಕ್ಕಮರಿಯಳು ಬಾವಳ ಬದ್‌ಕಾಲ್
ಕಷ್ಟವು ದುಃಖವು ಕಾಟತೆ ನೀನ್
ನಂದಾಯಿ ಚಾಕಿತ್ ಪೊಲತಂದೆಣ್ಣೆ
ಬೋಡ್‌ನ ನಿನ್ನ ಎಕ್ಕಲೂ ನಾನ್ ||

ಸದ್ದೆ ಮಾಡತೆ ಬಂದಿತ್ ನೀನ್
ತಿತ್ತಾರ ಮಳೆನ ಪೂಜ್ಜಿಟಿಯ ನಾಕ್
ಬಟ್ಟೆಯು ಕಾಂಗತೆ, ನಡಪಕು ಕೈಯತೆ
ಬದ್‌ಕಾವ ಆಶೆನ ಬಲ್‌ಚಿಟಿಯಾ|

ಪೂ, ಬೀರ್‌ವ ಮಿಂಞಲೆ ಮೊಗ್ಗನ ನುರ್‌ಕಿತ್
ಗಿಡತಾರ ಬೇರ್‌ನ ಬಲ್‌ಚಿಟಿಯಾ
ದಾರ್‌ಕೂ ಅರಿಯತೆ ಬಂದಿತ್ ನೀನ್
ಜೀವತೊಡೆ ತನ್ನ ಕೊಂದ್‌ಟಿಯಾ | ನೀನ್ ||

ಹಣೆಬರ ನಾಡ ಕೆಟ್ವಾ ಪೋಚಿ!
ಬದ್‌ಕಾರ ಅರ್ಥವೆ ತಿಕ್ಕಿ ಪೋಚಿ !
ನೆಮ್ಮದಿ ಬದ್‌ಕಾಕ್ ಇಲ್ಲತೆ ಆಚಿ !
ಬಾವಳ ಆಶೆಯು ಇಂಗಿ ಪೋಚಿ || ಬಾವಳ....

ಬಯತ್

ಪದ್ನಾರ್ ಬಯತ್
ತಡಿ ದುಂಬಿಬಪ್ಪಕ
ಮನಸ್ಸೆಣ್ಣೆಚಿ
"ಯೌವನ"
ಎಚ್ಚಕ್ಚಾಯ್
ನೆರೆಬಂದ್ ನಡುಬಗ್ಗಿ
ತಡಿಕರಿಪೋಪಕ
ಅದೇ ಮನಸ್ಸು
ನಾಕೆಣ್ಣೆಚಿ
ಬದ್ಕ್
ಬರಡಾಯಿ
ಪೋಚಿ

ಮನುಷ್ಯನಾಟ

ತಕ್ಚಾಕೆಲ್ಲಾ
ಅರೆ ಪಿರಾಂದನನಕೆ
ನಿಪ್ಪ, ನಡಪಗತ್ತೆಲ್ಲಾ
ಪುಚ್ಚಿ ಪುಡ್ಚನಾಯಿನನಕೆ
ಕಳಿ, ತೆಳಿಯೆಲ್ಲಾ
ರೇಸಾರ ಕುದುರೆನನಕೆ
ಆಟ್ ಪಾಟ್ಯೆಲ್ಲಾ
ಕಳ್ಳು ಕುಡ್ಚೆ ಕೋಡನನಕೆ
ಮಾನ ಮರ್ಮಾದೆ ನರ್ಂಜಿ
ಕಳಿಪ ತೆಳಿಪ
ಬುದ್ಧಿ ಬಪ್ಪ
ಬಾಯಿಕ್ ಮಣ್ಣೊಬೂವಕಾಪಕ

ರಾಜಕಾರಣ

ಕಪ್ಪೆನ ಪುಡ್‌ಚಿತ್ | ತಕ್ಕಡಿಕ್‌ಟ್ಟಕ
ಒಂದಾನ ಇಡ್‌ವಕ | ಇಂಞೊಂದ್ ಪಾರ್‌ಚಿ|
ಅಲ್ಲಿಂಜಿ ಇಲ್ಲಿಕ್ | ಇಲ್ಲಿಂಜಿ ಅಲ್ಲಿಕ್
ಪಾರ್‌ಚಿ | ಪಾರ್‌ಚಿ | ಅಪ್ಪರ, ಇಪ್ಪರ |
ಒಂದೊಂದೇ ಪಾರ್‌ಚಿ ಅಪ್ಪರ ಇಪ್ಪರ ||

ಅನ್ನನೆ ಜನಕಿಂದ್ | ಪಾರುವ ಕಾಯಿಲ
ಪುಡ್‌ಚಿತ್ ಜನಕ್ಕಿಂದ್ | ಬುದ್ಧಿಯು ಕೆಟ್ಟತ್
ಆ ಪಕ್ಷ ಬುಟ್ಟಿತ್ | ಈ ಪಕ್ಷಕ್ ಪಾರುವ
ತಕ್ಕಡಿಲಳತ ಕಪ್ಪೆಯಳಾಯಿತ್||

ಮನೆ ಮನೆ ಬಂದಿತ್ | ಕೈ ತೊತ್ತ್ ನಿಂದಿತ್
ಪೆರಿಯವು ಎಳಿಯವು | ಒಂದೂ ನೋಟತೆ
ಕಾಲ್ ಪುಡ್‌ಚಿತ್ | ಗೆದ್ದಿತ್ ಬಂದಿತ್ |
ನಂಬ್‌ನ ಜನಕಿಂದ್ | ಮೋಸ ಮಾಡುವ
ತಕ್ಕಡಿಲಳತ ಕಪ್ಪೆಯಳನೆಕೆ ||

ಅಧಿಕಾರ, ಆಸ್ತಿಯು, ಪಣವು ದುಂಬ್ಬಕ
ಕೊಂಬ್ ತಪ್ಪಾನ ಕೋಡಂಗಳನೆಕೆ
ಕೊಂಬ್‌ಜಿ ಕೊಂಬ್‌ಕ್ ಪಾರಿತ್ ತೂಂಗಿತ್
ಕೋಡಂಗಳನೆಕೆ ಕಳ್‌ಚಿತ್ ಕಾಟ್‌ವ
ಎಲ್ಲಾನೊ ಮರಂದಿತ್ ಅಧಿಕಾರಕಾಯಿತ್
ತರತರ ರಂಗ್‌ರ ಕಳಿಯು ಕಳ್‌ಚಂಡ್

ಗದ್ದಿತ್ ಬಂದಿತ್ | ಅಧಿಕಾರ ಕ್‌ಟ್ಟಕ
ಮಕ್ಕ ಮರಿಮಕ್ಕ ತಲೆಮಾರ್‌ಕೆಲ್ಲಾ
ಆಸ್ತಿಯು ಪಣವು ಗುಡ್ಡೆ ಮಾಡಿತ್
ಬೇನಾಮಿ ಪೆದತ್ ಬ್ಯಾಂಕ್‌ಲ್ ಬೆಚ್ಚಿತ್
ಬದ್‌ಕ್‌ಲ್ ನಾನ್ ಬಂಬದೆಣ್ಣೆಯಂಡ್
ಆ ಪಕ್ಷ ಬುಟ್ಟಿತ್ ಈ ವಕ್ಷಕ್ ಪಾರ್‌ವ
ತಕ್ಕಡಿಲಳತ ಕಪ್ಪೆಯಳನೆಕೆ ||

ಸ್ವತಂತ್ರ ಕೆಟ್ಟಿತ್ ಅರ್ವದ್ ಕಾಲ
ಕಯಿಂಜತ್ ಜನತ್‌ರ ಬದ್‌ಕುವಕಾಲ
ಗರೀಬಕೆಕ್ಕಲೂ ಬಂಡಾಟ ಬದ್‌ಕ್
ಪಣಕಾರಕೆಕ್ಕಲೂ ಗೌಜಿರ ಬದ್‌ಕ್
ಅಂದೂ ಬಡವನೆ ಇಂದೂ ಬಡವನೆ
ಬಾಳ್‌ರ ಉದ್ದಕ್ಕೂ ಬಂಡಾಟ ಬದ್‌ಕ್ |

ಹೆತ್ತವ್ವ

ಎಲ್ಲಿಕ್ ಪೋಯಿಟಿಯಾ... ಅವ್ವ ನೀನ್

ಎಲ್ಲಿಕ್ ಪೋಯಿಟಿಯ ||

ದಾರ್ಕು ಕಾಂಗತೆ | ತಬ್ಬಲಿ ಮಾಡಿತ್ |

ಎಲ್ಲಿಕ್ ಪೋಯಿಟಿಯಾ |

ತಪ್ಪಾನ, ಒಪ್ಪಾನ | ಕೆಲತ್ ಬೆಚ್ಚಿತ್ |

ಅಪ್ಪಂಡ ಚೆಡಿಂಜೆ | ನನ್ನ ಪೋತಿತ್ |

ನಿಪ್ಪಕ, ನಡಪಕ | ಕೂಡೆನ್ನೆ ಇಂಜಿತ್ |

ಒಪ್ಪರ ಚಾಯಿಲ್ | ಚಾಕಿತ್ ನೀನ್ ||

ಅಂಜಿ ಬಯತ್, ದುಂಬ್ಬಕ ನಾಕ್

ಕೈ ಪುಡ್ಚಿ ಅಕ್ಕರ ತಿದ್ದಿತ್ ನೀನ್

ಆಟ್ಲಾ ಪಾಟ್ಲಾ ಕೊದ್ಚಂಡ್ ನನ್ನ

ಬುದ್ಧಿ ಎಣ್ಣೆತ್, ನಂದಾಯಿ ಬದ್ಕಕ್

ಬದ್ಕರ್ ಬಟ್ಟೆಕ್, ಬೊಳಿಕಾಟಿನಿಂದ್ ||

ಮೀಸೆ ಬಂದಿತ್ | ಆಳಾಯಿ ನಿಪ್ಪಕ

ನನ್ನ ನೋಟಿತ್ ದುಃಖ ಮರ್ಂದಿಯಾ|

ಕುಂಞಿಂದೆಣ್ಣೆತ್ ಕೊದ್ಚಿ ಚಾಕಿತ್

ಕಷ್ಟವು ಕಯಿಂಜಿತ್ ಸುಖ ಬೊಳಿ ಕಾಂಬಕ

ಬಯತ್ಕು ಬಂದ ನನ್ನ ಬುಟ್ಟಿತ್ ||ಎಲ್ಲಿಕ್||

ಅಪ್ಪನಿಲ್ಲತ ದುಃಖಿತಾರಿವು
ಒನ್ನಾಂದೂ ನಾಕ್ ಗೊತ್ತಾಕತನೆಕೆ
ಅವ್ವನು ಅಪ್ಪನು ದಂಡಾಳು ನೀನಾಯಿ
ಪೊಲತಿತ್ ಚಾಕುವ ನಿನ್ನ ಕಂಡಂಡ್
ಧೈರ್ಯತ್ ನಾನ್ ಬೊಳಂದಂಡ್ ಬಂದ ||

"ತಬ್ಬಲಿ"ಂದೆಣ್ಣುವ ತಕ್ಕಾರ ಮರ್ಮ
ಅಪ್ಪಚತ್ತಲ್ಲಿ ಅರಂಜಿಲೆ ನಾಕ್ |
ಇಂದಿಕ್ಕ ಬಂದ ತಬ್ಬಲಿ ಪಟ್ಟಿತ್
ಆಣಾಯಿ ಪರಂದ್ ಬೀರ್ಯ ಉಂಡೇಂಗ್ಯೊ
ನೀನಿಲ್ಲತೆ ಬದಾಕ್ ಇರಾಟಾಯಿ ಪೋಚಿ ||ಎಲ್ಲಿಕ್||

ಕಾವೇರಮ್ಮೆಯು ಇಗ್ಗುತ್ತಪ್ಪನು
ನೀ ಪೋಪ ಬಟ್ಟೆಕ್ ಬೊಳಿಯಾಯಿನಿಂದ್
ಮಿಂಞ್ಲಾತ ಜನ್ನತು ಮೋವಾಯಿ ಪುಟ್ಟಿತ್
ಋಣತ್ನ ತೀಪಕ್ ಅವಕಾಶ ತಾಂದ್
ಬೋಡುವಿ ನಾನ್ ಕೈ ತೊತ್ತನಿಂದ್ || ಎಲ್ಲಿಕ್||

ನಾಡ ಕೊರವುಕಾರ

ತ್ರಿಂಬಾತ್ ಕುಡಿಪಾತ್ ಶಿಸ್ತಲ್ ಇಂಜತ್
ಎಕ್ಕಲೂ ಜನತಾರ ಮದ್ಯತೆ ಬದಾಕ್ಯಂಡ್
ಮಕ್ಕಡ ಜೊತೆಲ್ ಮಕ್ಕಳಾಯಿತ್
ಎಲ್ಲಾಡ ಕಷ್ಟಕ್ ಸುಖಿತಾನ ಬಯಂದಂಡ್
ನಲ್ಲಾಮೆ ಕೊಂಡಾಡಿ ಬದಾಕಿಯಂಡಿಂಜತ್
ಅವನೇ ನಾಡ ಕೊರವುಕಾರ |

ನಮ್ಮೆಲ್ ನಾಳ್ಲ್ ನೆಮ್ಮದಿ ಕಂಡಂಡ್
ಪೊಮ್ಮಾಲೆ ಕೊಡಗಾರ ಆಯಿಮೆಕೋಯಿಮೆಲ್
ಮಂದಲ್ ಮಾನಿಲ್ ಮುಂಬರತಿಂಜಂಡ್
ತಕ್ಕಲ್ ಬಾಕ್ಲ್ ಐಲಾಟ ಪರಂದಂಡ್
ಬೆಂದುವು ಚಾಟೆಯು ಕೊಂಡಾಡ್ಪಿಂಜಂತ್
ಅವನೇ ನಾಡ್ ಜೊತೆಕಾರ |

ಪಟ್ಟಾಳ ಬದ್‌ಕ್ ಬದ್‌ಕಿತ್ ಬಂದಂವೊ
ಪಲತರ ಬದ್‌ಕ್ ಕಂಡಿತ್ ಬಂದಂವೊ
ತರತರ ಅರಿವು ಪಡ್‌ಚಿತ್ ಬಂದಂವೊ
ಎಲ್ಲಾಡ ಬದ್‌ಕ್‌ಲ್ ಒಗ್ಗಿಯಂಡ್ ಪೋಪಂವೊ
ಬದ್‌ಕ್‌ಲ್ ಎಕ್ಕಲೂ ನೆಮ್ಮದಿ ಕಂಡಂವೊ
ಅವನೇ ನಾಡ ಕೊರವುಕಾರ |

ದುಂಬ್‌ನ ತಡಿಯು ಇವಂಡದ್ ನೋಟ್
ಕೊಂಬ ಮೀಸೆರ ಚಾಯಿ ನೋಟ್
ತಕ್ಕಲ್ ಬಾಕ್‌ಲ್ ಪಡಿಪ್‌ಲ್ ನಡಪ್‌ಲ್
ನ್ಯಾಯತ್ ನೀತಿಲ್ ಸತ್ಯತ್ ಧರ್ಮತ್
ಪತ್ತ್ ಜನತ್‌ರ ಮನಗಿದ್ದವ್ ನೋಟ್
ಅವನೇ ನಾಡ ಕೊರವುಕಾರ |

ಸುಬ್ರಹ್ಮಣ್ಯ

ಬಂದ ಬಂದ ಬಂದ ನಾನ್ |
ಸ್ವಾಮಿ ನಿನ್ನ ಬೋಡ್ಡಕ್
ಬಂದ್ ನಿಂದ್ ಕೈಯ್ಯ್ ತೊತ್ತ
ಅಡ್ಡ ಬುದ್ಡ ನೀಕಿಂದ್ ||೧||

ಕುಂದ್ ಕಾಡ್ ನಡುಲ್ ನಿಂದ್
ಭಕ್ತ ಜನಕ್ ಎಕ್ಕಲೂ|
ಒಮ್ಮೆ ಕೂಡ ಭಕ್ತ ಜನಡ
ನೆಮ್ಮದಿನ ಕೆಡ್ತತೆ ||೨||

ಸುಬ್ರಮಣ್ಯ ಕಾರ್ತಿಕೇಯ
ಎಲ್ಲಾ ಪೆದವು ನೀಕಾಲಾ |
ಆದಿಸ್ಥಾನ ನೀಡ ಕಂಡ್
ಮನತ್ ತೊತ್ತಾನಿಂದೆನೋ ||೩||

ಪಣ್ಣ್ ಪಾಲ್ ನೀಕ್ ತಂದ್
ನಿನ್ನ ಬೋಡಿ ನಿಂದೆನೋ
ಮಕ್ಕಬೋಂಡುಂದೆಣ್ಣಿ ನಾನ್
ಆಲ್ ಮರಕ್ ಸುತ್ತಾನ ||೪||

ಪರಕೆ ಕೆಟ್ಟೆ ಅಡ್ಡ ಬುದ್ಧ್
ಮಕ್ಕಳಲ ಪಡ್ಂದೆನೊ |
ಬದ್ಕ್ ನಾಡ ಸಾರ್ಥಕಾಂದ್
ನೆಮ್ಮದಿನಾ ಪಡ್ಂದೆನೋ ||೫||

ನೀನೊಂದೆಣ್ಣೆ ಅರಿಯತೆ ನಾನಾ
ನಿನ್ನ ಬಡ್ಚಿ ಕೊಂದೆನೋ |
ನಿನ್ನ ಕೊಂದ ದೋಷತ್ತಾನ
ತೀಪಕಾಯಿ ನಾ ಬಂದೆನೊ ||೬||

ಪಚ್ಚೆನೀರಲ್ ಕುಳಿಚಿ ತಂದ್
ಶುದ್ಧತಲ್ ನಾನಾ ಬಂದಿತ
ನಾಗ ಪೂಜೆ ಶ್ಲೇಷ ಬಲಿಯು
ದಂಡೂ ಕೈಚಿ ಬೋಡ್ನ ||೭||

ನೀಡ ಸೇವೆ ಮಾಡಿತಂದ್
ನಿನ್ನ ತೃಪ್ತಿ ಪಡ್ತಿದ್ |
ಎಲ್ಲಾ ಮಾಡಿ ನೆಮ್ಮದಿಲ್
ತೃಪ್ತಿಕೊಂಡ್ ಬಂದೆನೊ ||೮||

ನಾಡ ಪಾಪ ತೀಂದತಾಂದ್
ಮನತಾರೊಳ್ಲಾಲೆ ಹಿಗ್ಗೊನ
ತಿತ್ತ್ ಮಳೆಯು ಪೊಜ್ಜಿತಿಂದ್
ನಾಡ್ ಬದ್‌ಕ್ ಬೆಂಜತ್ ||೯||

ನಿನ್ನ ತುದ್‌ಚಿ ಸೇವೆಮಾಡಿ
ನೆಮ್ಮದಿ ನಾ ಪಡ್‌ಂದಾಲೆ |
ಸ್ವಾಮಿ ನೀಡ ನಡೆಲೊನಿಂದ್
ಕಣ್ಣ್ ನೀರ್ ಇಟ್ಟಿತ್ ||೧೦||

ಮನತ್ ದುಂಬ್‌ನ ದುಃಖಯೆಲ್ಲಾ
ನೀಡಪಾದಕ್‌ಂದೆಣ್ಣೆನಾ |
ಅಡ್ಡ ಬುದ್ಡ್ ಬೋಡಿತಂದ್ |
ಕಣ್ಣ್ ನೀರ್ ಇಟ್ಟಿತ್ ||೧೧||

ದಂಡ್ ತುಳಿ ಕಣ್ಣ್ ನೀರೇ
ನಾಡ ಕಾಣಿಕೆಂದೆಣ್ಣೆತ್
ದುಃಖಗೊಂಡ್ ನಿನ್ನ ಕಂಡ್
ನಾ ಪೋರಟ್ ಬಂದೆನೋ
ಸ್ಕಂದ ನೀನೇ ಕಾರ್ತಿಕೇಯ
ಸುಬ್ರಮಣ್ಯ ಸ್ವಾಮೀಂದ್ |

ಕೊಡಗ್ ನಾಡ್

ನಂಗಡ ನಾಡ್ ಈ ಕೊಡಗ್
ಚಾಯಿರ ನಾಡ್ ಈ ಕೊಡಗ್
ವೀರಂಗ್ ಶೂರಂಗ್ ತಾಯಿ ನಾಡ್||
ಕುಂದ್‌ಕ್ ಕುಂದೇ ಸವಾಲೊಡ್ಯಂಡ್
ನಾಲ್ದಿಕ್ಕ್ ಪಬ್ಬನ ಈ ಕೊಡಗ್ ||೧||

ತಡಿಯಂಡ ಮೋಳ್‌ಂಜಿ
ಕೋಟೆ ಬೆಟ್ಟ ನಡುಲಿಂಜಿ
ಬ್ರಹ್ಮಗಿರಿ ಉದ್ದಕ್
ಮೆರಂದಂಡುಳ್ಳ ಈ ಕೊಡಗ್
ಚಾಯಿರ ನಾಡ್ ಈ ಕೊಡಗ್

ಫಲತರ ಪೂವ್ ಕಾಡ್‌ಲ್ ಉಂಡ್
ಪಣ್ಣ್ ಪಲವು ದುಂಬಿಯಂಡುಂಡ್
ತೇಗ, ಬೂಟಿ, ಪಾಲಂಜಿ ಪಲಚಿ
ನೊಗಮರ, ಕೈಮರ ಎಲ್ಲವು ಉಂಡ್
ದುಂಬಿಡುಳ್ಳ ಕಾಡೂ ಉಂಡ್
ಚಾಯಿರ ನಾಡ್ ಈ ಕೊಡಗ್ |

ಕಾಡ್‌ಲ್ ತರತರ ಪ್ರಾಣಿಯಳುಂಡ್
ಕರ್‌ಮಂಜಿ, ಎಲ್‌ಂದೇ ಪಾಲೆ ಪಣ್ಣ್
ಕೋತೇನ್, ಪೊಂದೇನ್ ಮೂಲಿತೇನುಂಡ್
ಚಾಯಿನ ಕಂಡಿತ್ ತುದ್‌ಚಂಡುಂಡ್ |

ಕಾಡ್‌ನ ಕೆತ್ತಿತ್ ನಾಶಲೊ ಮಾಡ್‌ಚಿ
ಪಣತಾರ ಪೊಳೆಯೇ ಪರಿವಕ್ ಆಚಿ
ಇದ್ ಕಂಡ ಜನಕ್ ದುರಾಸೆ ಪುಟ್ಟ್‌ಚಿ
ಬೆಲ್ಲಕ್ ಮುತ್ತವ ಉರ್‌ಪಾರ ಪೋಲೆ
ಬಯ್ಯತೆ ಬುದ್ಧತ್ ಕೊಡಗ್‌ರ ಮೇಲೆ
ನಂಗಡ ನಾಡ್ ಈ ಕೊಡಗ್

ಪ್ರಕೃತಿ ಸಿರಿರ ಚಾಯಿನ ಕಂಡಿತ್
ಲಗ್ಗೆ ಇಟ್ಟುಂಡ್ ನುಗ್ಗಿಯಂಡ್ ಬಾತ್
ಉಂಬುಳ್ ಪೋಲೆ ಚೋರೆನ ಕುಡ್‌ಚತ್
ಇಂದಿಕ್ಕ ನಂಗ ವರ್ಕಂಜಿ ಎದ್ದಿತ್

ಕೊಡಗ್‌ರ ಸಿರಿನ ಉಳಿಚಿಡುವಕ್
ಕೈ ತೆಕ್ಕಿ ನಿಕ್ಕಂಡು ನಂಗೆಲ್ಲಾ
ನಂಗಡ ನಾಡ್ ಈ ಕೊಡಗ್ !

ಪುತ್ತರಿ

ಬಾತ್ ಬಾತ್ ನಂಗಡ - ಪುತ್ತರಿ |

ಪೊಲಿ ಪೊಲಿಂದೆಣ್ಣೆಯಂಡ್ ||ಬಾತ್ ಪುತ್ತರಿ |

ವಾರಾಂಡೆಕೋರಮ ಬಪ್ಪ ಈ ನಮ್ಮನಾ

ಎಲ್ಲಾರೂ ಕೂಡಿ ನಂಗ ಚಾಯತೆ ಕೈಯಿಕನಾ ||

ಬಡವ ಪಣಕಾರ ಬೇಧ ಮರ್ಂದಿತ್

ಕಾವೇರಮ್ಮರ ಮಕ್ಕ ನಂಗೆಲ್ಲಾಂದೆಣ್ಣೆತ್ |

ಪುದಿಯಕ್ಕಿ ಪುದಿಯ ಬೊಳೆ, ಮನೆಕ್ ಕೋಂದಿತ್

ಒತ್ತೋರ್‌ಮೆಲ್ ನಂಗ ಪುತ್ತರಿ ಕಯಿಕನ ||ಬಾತ್||

ಓಣನಮ್ಮೆ ಕೈಂಜಿತ್, ಮೂಂದ್ ತಿಂಗತ್

ಪಾಲ್ ದುಂಬಿ ಕದ್‌ಕೊನೆಯು ನಿಂದಿತ್ |

ಪೊಂಬಣ್ಣ ಸಿರಿದುಂಬಿ, ಭೂಮಿ ನೋಟಿ ಬಾಂಗಿತ್

ಪುತ್ತರಿ ನಮ್ಮೆಕೋಂದ್ ಎಲಂಗಿ ಎಲಂಗಿ ನಿಂದಿತ್ ||ಬಾತ್||

ಕೋಲಂಬಾಲೆ ತಟ್ಟಿ ನಂಗ ಮನೆ ಮಾರ್ ವೈಕಿತ್

ಚುಣ್ಣ ಬಣ್ಣ ಪೊಜ್ಜಿತ್, ಯಲಂಗುವನಕೆ ಮಾಡಿತ್

ಅಕ್ಕಿ ಬರ್‌ತ್ ಪೊಡ್‌ಚಿತ್, ಬಾಳೆಕೊಲೆ ಕೆತ್ತಿತ್

ಪುದಿಯ ಬಟ್ಟೆ ಪೊಂದಿತ್, ನಮ್ಮೆಕಾಯಿಕಾತಿತ್ ||ಬಾತ್||

ಚೆಂಡ್ ಪೂ ಮಾಲೆ ಕೊಯಿತ್, ಮನೆಕೆಲ್ಲಾ ಕೆಟ್ಟಿತ್
 ನೆಲ್ಲಕಿ ನಡುಬಾಡೆ, ಒಡ್ಕಿ ತಳ್ಚಿ ಮಾಡಿತ್
 ಪಟ್ಟೆದಾರ, ಬಾಲೆಕಾರ, ಪೊಮ್ಮಕ್ಕಳು ಕೂಡಿತ್
 ಪೊಲಿಕಾಕಿ ನೆರೆಕಟ್ಟಿ, ನೆಲ್ಲ ಬೊಳೆನ ತುದ್ಚಿತ್
 ಪೊಲಿ ಪೊಲಿ ಪೊಲಿ ದೇವಾಂದೆಣ್ಣಿಯಂಡ್ ||ಬಾತ್||

ಕುಂಞಿ ಮೂಡಿ ತಂಗೆ ಕುಂಞಿ, ವಸ್ತ್ರಕಟ್ಟಿ ಪೊಡಿಯ ಉಡ್ತತ್
 ತಳಿಯತ್ ಬೊಳಕೆಡ್ತತ್ ಮಿಂಞ್ ಮಿಂಞ್ ನಡಂದತ್ |
 ಕುತ್ತಿರೊಳ್ಲ ಕತ್ತಿ ಬೆಚ್ಚಿ, ಕಂಡಿಪಾಲೂ ಬೆಚ್ಚಿತ್
 ಕುಪ್ಪಚೇಲೆ ಇಟ್ವೊರಟ್, ಕುತ್ತಿಯೆಡತ್ ಪಟ್ಟೆದಾರ
 ಪಟಾಕಿ ಸದ್ಗೊಂಡ್ ಎಲ್ಲಾ ಪೊರಟತ್
 ಪೊಲಿಯೇ ಬಾ... ಪೊಲಿ ಪೊಲಿಯೇ ಬಾ.... ||

ಯಾಕತಿಂಜ ಪೊಂಬೊಳೆಯೊ ಆಂಗಿ ಜೂಂಗಿ ನಿಂದಿತ್
 ಬೊಡಿ ಬೆಚ್ಚಿ, ಬೊಳ್ಚ ಬೆಚ್ಚಿ, ಪೊಲಿ ಪೊಲೀಂದ್ ಕಾಕಿತ್
 ಕುತ್ತಿದುಂಬ ಕದ್ ಅರ್ತ್ ಎಲಾರುಕೂ ಕೊಡ್ತಿತ್
 ಪೊಲಿಕಾಕಿ, ಪೊಲಿಕಾಕಿ, ಐನ್ ಮನೆಕ್ ಬಂದಿತ್
 ನೆಲ್ಲಕ್ಕಿ ನಡುಬಾಡೆಲ್ ಕದ್ ಬೆಚ್ಚಿನಿಂದಿತ್
 ನಾಲ್ ತಕ್ಕ ಪರಂದಿತ್, ಕೈಕಾಲ್ ಪುಡ್ಚಿತ್ || ಬಾತ್||

ಪುದಿಯಕ್ಕಿ ಪಾಯಸವು ಏಳಕ್ಕಿ ಪುಟ್ವೊಮಾಡಿ
 ತಾಮನೆ ಮೂಡಿಯಡ ಪೆದ ಎಣ್ಣೆಕನಚಿತ್
 ಒತ್ತೋರ್ಮೆ ಗುರ್ತಾಯಿ ಕೂಡಿ ಆಡಿ ಉಂಡತ್
 ಒಂದಾಯಿ ಪಿರ್ಂಜತ್, ನಮ್ಮನಾ ಕೈಯಿಚಿತ್||
 ಬಾತ್ ಬಾತ್ ನಂಗಡ ಪುತ್ತರಿ ||

ಫೀ. ಮಾ|| ಕಾರ್ಯಪ್ಪ

ಆರೋಂದ್ ಕೇಪಿರೋ, ಆರೋಂದ್ ಕೇಪಿರೋ
ಧೀರನಾ ಪಡೆಕಾರನೋ |

ಬೀರಾಳಿ ಶತ್ರುವಳ ಗಾಡ್‌ಪಾಚಿಟ್ಟು
ಶೂರನಾ ಪಡೆಕಾರನೋ

ಪಡೆಕಾರ ಮಕ್ಕಕ್, ಒಬ್ಬನೇ ನಾಯಕ
ಮೈ ಕೈ ದುಂಬಿಯಂಡ್ |

ಬಾಂಬ್‌ನ ಕನ್‌ಚಿತ್, ಒಳ್‌ಚಿತ್ ಬೊಡಿಬೆಚ್ಚೆ
ಧೀರನಾ ಪಡೆಕಾರನೊ ||

ಅಪ್ಪಂಡ, ಅವ್ವಂಡ ಕೊದಿಕಾರ ಕುಂಞಿಯು
ಆಯಿತ್ ಅವನೊಬ್ಬನು|

ದೇಶತ್ ಸೇವೆಕ್ ಬೊತ್ತತೆ ಪೊರಟೋರ್
ಗತ್ತಾರ ಪಡೆಕಾರನೊ |

ಆಶೆಕೂ, ಭಾಷೆಕೂ, ದೇಶಕೂ ಕೀರ್ತಿನ
ಕೊಂಡ್ ಬಂದವನೊ |

ಕಾವೇರಮ್ಮರ ಕೀರ್ತಿಕೂ ಪೂಬೆಚ್ಚೆ
ನಡಂದಂವ ಅವನೊಬ್ಬನೊ |

ಬಾಲೆಕಾರಕ್ ಬಾವಳ ಬಟ್ಟೆನ

ಕಾಟಿತ್ ಕೊಡ್ತವನೊ |

ಅವ್ವಂಡ ಋಣತ್ನ ತೇಕಂಡುಂದೆಣ್ಣುವ

ಬುದ್ಧಿ ಪರಂದವನೊ |

ಅಧಿಕಾರಿ ನಂಗಳೇ ಎಣ್ಣೆ ಬೀಗ್ನ

ಬ್ರಿಟಿಷ್ ಪಡೆಕಾರಕ್

ನಂಗಡ ಮಣ್ಣಾಲ್ ಚೊಕ್ಕಿತ್ ಕಳಚಕ

ಚೊಕ್ಕನ ಅಡಕುವಂದ್ |

ಎಣ್ಣೆತ್ ಎದೆಮಲಾಕಿ ನಿಂದತ್ ಅಂದ್

ಕೇಳಿರ ಪೆದಲಾಯಿತ್ |

ಶಿಸ್ತನ ಎಕ್ಕಲು ಮನತ್ಲಾ ಬೆಚ್ಚಂಡ್

ಮರೆಯತೆ ನಡಕಂಡುಂದ್ |

ನಡಪಕ, ನಿಪ್ಪಕ, ತಿಂಬಕ, ಉಂಬಕ

ಸಮಯಕ್ ಬೆಲೆಕೊಡ್ತಂಡ್ |

ನಿಂಗಡ ಬಟ್ಟೆಲೇ ನಂಗಳೂ ನಡಂದಿತ್

ಕೀರ್ತಿನ ಕೊಂಡಾಡಿಯಂಡ್ |

ನಿಂಗಡ ಮನಕ್ ಶಾಂತಿನ ಬೋಡುವ

ಎಕ್ಕಲೂ | ನಿಂಗಳ ನೆನತಂಡ್ |

ಬಿಂಬ ಆಣ್

ನೀನ್ ಬಾರಿ ಬಲ್ಯ ಬಂಬ,
ತೆಳಿಲು, ಕಳಿಲು, ತಕ್ಕಲ್, ನಡಪಲ್
ನೀ ಬಾರಿ ಬಲ್ಯ ಗಟ್ಟಿಗ |

ಅಂದ್ ಸೀತೆನ -
ರಾವಣಂಡ ಲಂಕೆಲ್ ಬುಟ್ಟಿಯಾ |

ಅಹಲೈನ - ಇಂದ್ರಂಡ ಕೂಡ
ಬುದ್ಧವಕ್ ಬುಟ್ಟಿಯಾ !

ದ್ರೌಪತಿನ - ದುರ್ಯೋಧನಂಡ ತೊಡೆಲ್
ಅಳ್‌ಪಕ್ ಬುಟ್ಟಿಯಾ !

ಆಣಾಯಿತ್ ಇದ್‌ನೆಲ್ಲಾ ನೋಟಿಯಂಡ್
ಮೀಸೆ ತಿರ್‌ಕಾವ - ನೀ ಬಲ್ಯ ಬಂಬ ||

ಮೇನಕೆನ - ಮೋಹಿಚಿತ್
ಕುಂಞಿ ಪಡ್‌ಂದಿಯಾ |

ಕುಂತಿರ - ಮುಗ್ಧತೆರ
ಲಾಭ ಅಂದ್ ಪಡ್ಂದಿಯಾ |

ಕೈಕೆಡ ಚಾಯಿಕ್ ಚೋತಿತ್
ನಿನ್ನ ನೀನ್ ಮಾರಿಯಾ |

ಇದೆಲ್ಲಾ ಮಾಡಿತು ಮೀಸೆ ತಿರ್ಕುವ
ನೀ ಬಲ್ಯ ಬಂಬ ||

ಒಂದಲ್ಲ, ದಂಡಲ್ಲ, ಆಯಿರ ತಪ್ಪಾಕು
ನೀಕುಂಡ್ ಒಪ್ಪಾ
ಪೊಣ್ಣಾಕ್ ಮಾತ್ರ ಬಿರ್ಂದಾರ ಪಟ್ಟಿ
"ನಾಯಿ ಮುಟ್ಟಿನ ಕುಡಿಕೇಂದ್"
ಆಚೇಂಗ್ಲೂ ಗೊತ್ತಿಕ್ಕಡ್ ನೀಕ್
"ನೀಡ ಕೇಳಿ ಕೀರ್ತಿಲ್ ಪೊಣ್ಣಾರದೇ
ಬಲ್ಯಪಾಲ್ ಎಕ್ಕಲೂ"
ಆಚೇಂಗ್ಲೂ ಲೋಕತ್‌ರ ದೃಷ್ಟಿಲ್
ನೀ ಬಲ್ಯ ಬಂಬ ! ನೀ ಬಲ್ಯ ಬಂಬ

ಹತಿವೃತೆ

ಸೀತಾ ಮಾತೆ....

ಪತಿವ್ರತೆಂದೆಣ್ಣುವ ಪೆದವುಂಡ್ ನೀಕ್
ರಾಮನೆ ನೀಡ ಪ್ರಾಣಂದೆಣ್ಣೆತ್
ಗಾಂಧರ್ವ ರೀತಿಲ್ ಮಂಗಲಾಯ ಅವನ
ಅರಮನೆಕ್ ಕಾಲ್‌ಟ್ಟು ಆ ದಿನತಿಂಜಿ
ಕಷ್ಟವೇ ಆಚಿ ನೀಡ ಬದ್‌ಕ್‌ಲ್ ಪೂರ್ತಿ
ಆಚೇಂಗ್ಲೂ ಪತಿವ್ರತೆಂದೆಣ್ಣೆತ್ ನೆನತ್ಯವ ನಂಗ |

ರಾಮಂಡ ಕೂಡ ಕಾಡ್‌ಕ್ ಪೋಯಿತ್
ಕಳ್‌ಂಜಿ ತಿಂದಿತ್, ಪಿಲ್ಲಲ್ ಬುದ್‌ಂಡ್
ಎಲ್ಲಾ ತರತರ ಕಷ್ಟ ಸಹಿಸ್ಕಂಡ್
ಪರದೇಶಿರನಕೆ ಬದ್‌ಕಿಯ ನೀನ್
ಪದ್‌ನಾಲ್ ಕಾಲತ್ ಒಮ್ಮೆವು ನೀನ್
ಸುಖಿತ್‌ನ ಕಾಂಗತೆ ದಿನ ಕಯಿಚಿಯ ನೀನ್ |

ಲಂಕೆಕ್ ಪೋಯಿಶು, ಅಂಕೆಲೆ ಇಂಜಂಡ್
ರಾವಣ ಬಲೆಕ್ ಬೂವತೆ ನೀನ್ |
ಹನುಮಂಡ ಕೂಡ ಆಣೆಯು ಮಾಡಿತ್
ರಾಮನ ಮನತ್‌ಲೆ ತುದ್‌ಚಂಡ್ ಇಂಜಿಯ
ಪಡೆಗೊಂಡ್ ಬಂದಿತ್, ಲಂಕೆನ ಗೆದ್ದಿತ್
ನಿನ್ನ ಕಾಂಬಂಜಿ ನೆಮ್ಮದಿ ಪರಂದತ್ ||

ಆಚೇಂಗ್ಕೂ ರಾಮಂಡ ಮನತ್‌ಲ್ ದುಂಬ್‌ನ
ಸಂಶಯಂದೆಣ್ಣುವ ಪಿಶಾಚಿ ತೆಳೊಚೆತ್
ಅದಾನೆ ನಂಬ್‌ನ ರಾಮನ್ ನಿನ್ನ
ತಿತ್ತಲ್ ಚುಟ್ಟಿತ್ ಪರೀಕ್ಷೆ ಮಾಡ್‌ಚಿ
ಅದಲ್ ಗೆದ್ದಿತ್ ಪೊಣ್ಣಾರ ಮಾನಕ್
ಬೆಲೆ ಎಚ್ಚಕ್ ದೆಣ್ಣಾನ ಕಾಟಿತ್ ಕೊಡ್‌ತಿಯಾ |

ಇಂದೂ ಕೂಡ ತಿತ್ತಾರ ಪರೀಕ್ಷೆ
ಎಲ್ಲಾ ಕಡೆಯೂ ನಡಂದಂಡೇ ಉಂಡ್
ಆಚೇಂಗಿ ಚೀತೆ, ನೀಡಂತ ಪೊಂಗುಣ
ಪೊಮ್ಮಕ್ಕ ಮನಸ್ಸಲ್ ಕೊರು ಆಯಂಡುಂಡ್ |

"ಪತಿವ್ರತೆ" ಶಬ್ದಕ್ ಕಿಲ್‌ಂಬ್ ಪುಡ್‌ಚಕ
ಪೊಣ್ಣಾರ ಬದ್‌ಕ್ ನರಕವೆ ಆಕು!
ನೀ ನಡಂದ ಬಟ್ಟೆಲ್ ನಡಪಳ ಬುದ್ದಿ
ಎಲ್ಲಾಕೂ ಕೂಡ ಬಕ್ಕಡ್‌ಂದೆಣ್ಣೆ
ದುಂಬ್‌ನ ಮನತ್‌ಲ್ ಬೋಡ್‌ವಿ ನಿನ್ನ |

ತ೦ಗೆ ಕುಂಞಿಕ್

ಓ ತ೦ಗೆ ಕುಂಞಿ ... ನೀಕ್ ನಾನ್ ಬುದ್ಧಿ ಎಣ್ಣುಂಡು
ನೀಡ ಬದ್‌ಕ್ ನಂದಾಂಡುದೆಣ್ಣಕ ಎಚ್ಚರ ಎಣ್ಣುಂಡು ||
ಕೆಟ್ಟವನಾಯಿತ್ ಕಾಂಗು ನೀಕ್ ಸತ್ಯಪರೆವಕ
ಗುಟ್ಟಾನ ಎಣ್ಣೆತ್ ಬಟ್ಟೆನ ಕಾಟ್‌ವ ಅಣ್ಣನಾನಾಂಡು |

ಅಪ್ಪನು ಅವ್ವನು ಚತ್ತಿತ್ ಅಂದ್ ತಬ್ಬಲಿ ನಂಗಾಚಿ |
ಕಣ್ಣ್ ಕೆಟ್ಟಿತ್ ಕಾಡ್‌ಕ್ ಬುಟ್ಟಿ ಬದ್‌ಕ್ ನಂಗಕಾಚಿ |
ಗೋಳ್ ಬದ್‌ಕ್‌ನ ಕಂಡ್ ತೆಳ್‌ಚತ್ ಬೆಂದು ಚಾಚೆಯೆಲ್ಲಾ |
ಕೆಲಬರಿ ಕೆಟ್ಟಿತ್ ನಂದಾಂಡುಂದೆಣ್ಣೆತ್ ನಿನ್ನ ಚಾಕ್‌ನಲ್ಲಾ ||

ಚಾಯಿಕಾರತಿ, ಬೋಜಕಾರತಿ, ನೀನಾಯಿ ಬೊಳಿವಕಾ |
ನಿನ್ನ ಕೊದ್‌ಚಿತ್ ಬಾಲೆಕಾರೆಲ್ಲಾ ಮನೆಕ್ ಬಪ್ಪಕಾಚಿ |
ಬೀಂದ ಪೂವ್‌ರ ತೇನ್ ಕುಡಿಪಕ್ ದುಂಬಿಯ ಬಪ್ಪನಕೆ
ನೀಡ ಮನತ್‌ನ ಗೆಲ್ಲುವಕಾಯಿತ್ ಪಲ ತರತ್‌ಲ್ ||

ಎಚ್ಚರ ಕುಂಞಿ, ಬಂದ್ಯಂಗೆಲ್ಲಾಡ ನೊಣೆತಕ್ಕ ಕೇಟ್ ನೀನ್
ಎಚ್ಚರ ತಪ್ಪಿತ್ ಕಳಚಕ ಬಾಳಲ್ ಚಿಕ್ಕಿ ಪೋಕುಲಾನೀ |
ಪಲತರ ರೀತಿಲ್ ನೊಣೆತಕ್ಕ ಪರಂದ್ ಮನಗೆಲ್ಲುವಕಾಯಿತ್ |
ಒಂಟಿಕಾಲ್ ಬಕಪ್ಪಿನನ್ನೆ ಪಾರಕಾಕುವೆಲ್ಲಾ ||

ಅನ್ನತ ಬಲೆಲ್ ಕೆಣ್ಂಜಿ ಪೋಯಿತ್ ಮೋಸ ಪೋಂಡಾಂದ್
ಎಚ್ಚರ ಪರಂದಿತ್ ಬಟ್ಟೆ ಕಾಟವ ಅಣ್ಣನಾನಾಂಡು
ನೀಡ ಮಂಗಲ ಕೈಚಿತ್ ನಾನ್ ನೆಮ್ಮದಿಕಾಂಗಂಡು|
ಅಪ್ಪಂಡ ಅವ್ವಂಡ ಪೆದತನ ನಾನ್ ಕೊಂಡಾಡಿ ಬದ್ಕಂಡು||

ಓ ತಂಗಿ ಕುಂಞಿ... ನಾಡ ತಕ್ಕ ಕೇಪಕ ನೀಡ ಮನಸ್ಸಕ್ ನೊಂಬಲಾಕು,
ನೆಮ್ಮದಿಯಾಯಿತ್ | ಬದ್ಕಕ್ಕ ನೀಕ್ ತಕ್ಕರ ಬೆಲೆ ಅರಿವು |
ಬದ್ಕಲ್ ಎಕ್ಕಲೂ ಎಲ್ಲಾರೂ ನಂಗ ಎಚ್ಚರ ತಪ್ಪತಿರಂಡು
ಅಂದಕ ಮಾತ್ರ ನಂಗಕ್ ಬದ್ಕಲ್ ನೆಮ್ಮದಿ ಕಾಂಗುಲಾ |

ಬಾಳ

ಇಚ್ಛಕಾಲ ಚೂತಲೆ ಇಂಜಿ ನನ್ನ ನೀನ್ ಚಾಕಿಯಾ |
ಎಂತಕಷ್ಟ ಬಾತೇಂಗಿಯೂ | ನಾನ್ ಅದ್‌ನ ಮರ್‌ಂದನೋ ||

ಬದ್‌ಕ್ ನಾಡ ಪಾಲ್‌ಕ್‌ಲೊ | ನೆಮ್ಮದಿನ ತಂದತ್ |
ಒಮ್ಮಲೂ ಬದ್‌ಕ್ ಬೋಂಡಂದೆಣ್ಣೆ ಮನತ್ ಅರ್‌ಂಜಿಲೆ |
ಕಷ್ಟ ಸುಖವೂ ಬಂದ್ ನಿಂದ | ದಿನತ್‌ನ |ನಾ ಮರಿಯುಲೆ
ಮಂಜಿಪೋಲೆ ಎಲ್ಲ ನೀಂಗಿ | ಬದ್‌ಕ್ ನಾಡ ಕಯಿಂಜತ್ ||ಇಚ್ಛ||

ತಂಪ್ ಚಂದ್ರಂಡ ಬೊಳ್ಳಿ ಬೊಳ್ಳಿಲ್ ನನ್ನ ತಬ್ಬಿಕೊದ್‌ಚಿಯಾ |
ಅಂದ್ ತಂದ ಸುಖತ್ ನಾನ್ | ದೇವಲೋಕ ಕಂಡನೋ |
ಪಚ್ಚಿಪರಂದ ತಕ್‌ಬಾಕ್ | ಎಲ್ಲವೂ ನಾಕ್ ಕೇಕುಲಾ
ಮಂಡೆ ತೇಟಿ ತಬ್ಬಿಯಂಡ್ ನನ್ನ ಕೊದ್‌ಚಿ ಚಾಕಿಯಾ ||ಇಚ್ಛ||

ನನ್ನ ನೀಕ್ ಒಪ್ಪಾಚಿಟ್ಟಿತ್ | ಬಾಳ್ ಪೂರ್ತಿ ಆಚೀಂದ್
ನಾಡ ಬಾಳ್ ಸುಖ ದುಂಬ್‌ನ | ಬೀವನಾಂದ್ ಅರ್‌ಂಜಿತ್ |
ಕಾಲದುಂಬಿ | ಬಂದದಿನತ್ | ನೀಡ ಕುಂಞ್ಲಿರ ಅಪ್ಪನಾ |
ಕಣ್ಣಕುಂಞ್ಲಿ ಪೆತ್ತಿತಂದ್ | ಮಾವಿ ಮನತ್‌ನ ಗೆದ್ದೆನೊ ||ಇಚ್ಛ||

ನೀಡ ಬದ್‌ಕ್ ಪೊನ್ನಪೋಲೆ ಅಂಡುದೆಣ್ಣುವ ಗೇನತ್ |
ಎಂತ ಕಷ್ಟ ಬಂದತೇಂಗ್ಯೂ ಪಲ್ಲ ಕಡ್‌ಚಿ ಸಹಿಸ್‌ನ |
ಬದ್‌ಕ್‌ದುಂಬಾ ಸುಖತ್‌ಲೇ ನಾನ್ ನೆಮ್ಮದಿನ ಕಂಡಂಡ್ |
ಝಣ್ಣಾಮನೆರ ಕೇಳಿ ಕೀರ್ತಿಕ್ | ಬೆಲೆತಂದೀತ್ ಬದ್‌ಕ್‌ನ ||ಇಚ್ಛ||

ತೀರ್ಥಕುಳಿ

ಬಿಟ್ಟಿರ ಬೆಂದಾಕ ನಿಂಗಲ್ಲಾರು
ಕಾವೇರಿ ಕುಳಿಕನ ನಂಗಲ್ಲಾರೂ ||

ವಾರಾಂಡೆಕೋರಮ ತೊಲೆಯಾರ್ ತಿಂಗತ್‌ಲ್ |
ಪುಟ್ಟಿ ಬಪ್ಪ ಅವ್ವನ ಕೊಂಡಾಡನ | ನಂಗ ಕೊಂಡಾಡನ ||

ಚಂಗ್ರಾಂದಿ ದಿನತಾರ ನಲ್ಲನಾಳ್ ಮೂರ್ತತ್
ಗುಳ್ಳೆಗುಳ್ಳೆಯಾಯಿತ್ ಕುಂಡಿಕೆಂಜಿ ಉಕ್ಕಿತ್
ಅವ್ವ ಬಂದ ಸಂಬ್ರಮತ್‌ನ, ಮಕ್ಕೆಲ್ಲಾ ಕಂಡಿತ್
ಮುಂಜಿ ಮುಂಜಿ ಕುಳಾಚತ್

ಬ್ರಹ್ಮಗಿರಿ ಕುಂಡಿಕೆಂಜಿ ಮಾಯತ್ ಪುಟ್ಟಿತ್,
ಮೂಂದ್ ಮೈಲ್ ಮೊಟ್ಟೆಕಾಡ್ ಕಾಂಗತನಕೆ ಒಕ್ಕಿತ್
ಭಾಗಮಂಡಲ ಸಂಗಮತ್, ಕನಿಕೆ ಸುಜ್ಯೋತಿ ಕೂಡಿ
ಬಲ್ಯದಾಯಿ ಪೊರಟತ್ ದೇಶೋದ್ಧಾರಕ್ ||

ಬಲಮುರಿ ಜಾಗತ್ ಕಾತ್‌ನಿಂದ ಮಕ್ಕಕ್
ಭಾಷೆಕೊಡ್‌ತ್ ಎಣ್ಣಾಚಿ, ಮಕ್ಕಳೇ ಕೇಳಿರೋ..
"ತೀರ್ಥ ಬಂದ ಪಿತ್ಯಾಂದ್ ಬಲ ಮುರಿಲ್ ಕುಳಾಚಕ್"
ಪಾಪಕತ್ತಿ ನಿಂಗಳ ಪೂ ಪೋಲೆ ಚಾಕ್‌ವಿ||

ಒಕ್ಕಿ ಬಪ್ಪ ನೀರಾರ ರಭಸಕಂಡ ಪೊಮ್ಮಕ್ಕ
ಅವ್ವನ ತುದ್‌ಚಂಡ್ ಮುಂಜಿ ಮುಂಜಿ ಕುಳಾಚತ್ |
ಮಿಂಞಾಲಿಂಜ ಪೊಡಿಯನೆರಿ ಬೆಂಬರಿಕ್ ಆಚಿಲೋ
ಅಂದ್ ತೊಟ್ಟ್ ಇಂದೋಳ ಪೊಡಿಯನೆರಿ ಬಯ್ಯಕ್ ||ಬಪ್ಪಿರಾ||

ಒಕ್ಕನ ಕಡೆಯೆಲ್ಲಾ, ಬಿತ್ತ್‌ಬೊಳೆನಂದಾಯಿ |
ಕಟ್ಟಲಿಂಜ ಅಜ್ಜಂಗಕೂ, ತೊಟ್ಟಲಿಂಜ ಕುಂಞಿಯಕೂ|
ಬಾಲೆಕಾರ ಪೊಮ್ಮಕ್ಕಕ್, ಕುಂಞಿ ಮೂಡಿಕನ್ನಿಯಕೂ
ತಂದ ತಕ್ಕ ತಪ್ಪುವಕಾಗಾಂದೆಣ್ಣಿ ಬುದ್ಧಿ ತಿದ್ದಿತ್ ||ಬಪ್ಪಿರಾ||

ಮೂಡಿ ಮಕ್ಕ ಎಕ್ಕಲೂ ಮಣ್ಣಾಮನೆರ ಕೇಳಿಕ್
ಪೆತ್ತವ್ವ ಅಪ್ಪಂಡ ನಲ್ಲಾಮೆನ ತುದ್‌ಚಂಡ್|
ಬಾವ ಬಾಕೆ ಪೋನಲ್ಲಿ ನಲ್ಲಪೆದ ಎಡ್‌ತಿತ್
ತಾಮನೆ ಬಾಮನೆರ ಕೇಳಿ ಕೀರ್ತಿ ಕೊಂಡಾಡಿ ||ಬಪ್ಪಿರಾ||

ವಾರಾಂಡೆಕೋರಮ ನನ್ನ ಪೋಲೆ ಎಲ್ಲಾರು
ತಾ ಮನೆಕ್ ಬಂದಿತ್ ಕನ್ನಿಕಂಬ್ ತೊತ್ತಿತ್ |
ಕಣಿತೊತ್ತ್ ಕೈ ಕಾಲ್, ಕೊಣೆಕೊಣೆಲ್ ಪುಡ್‌ಚಿತ್
ನೆರಿ ಬೀಜಿ ಬಾಮನೆರ ಒಕ್ಕಾಮೆ ಪೊಲತಂಡು ||ಬಪ್ಪಿರಾ||

ಕೊಡಿ ಮೈಮ

ಬಾತ್ ಬಾತ್ ಬಾತ್ ಮನೆಕ್ ಓರ್ ಕೊಡಿ ಮೈಮ
ಕೊದ್ಚಿ ಕೈಚ ಮಂಗಲತಾನ ಚದ್ಚಿ ಬೆಚ್ಚ ಮೈಮ||

ಒಬ್ಬನೇ ಕೊಡಿ ಮೋವೊ ಬಯತ್ ದುಂಬಿತಿಂಜತ್
ಅಕ್ಕತಂಗ ಎಲ್ಲಾರ್ಕು ಮಂಗಲಾಯಿತಿಂಜತ್|
ನಮ್ಮನಾಳ್ ಬಪ್ಪಕ, ನಾಕ್ ತೊಂದರೆ ಆಪಕ|
ಬಂದ ಮೋಳಿಯ ಮೈಮಂಗೆಲ್ಲಾ ಬುದ್ಧಿತಕ್ ಪರಂದತ್ ||೧||

ತಡಿಲ್ ಚೋರೆ ಕಮ್ಮಿ ಆಚಿ ಬಯತ್ಕಾಲ ಬಪ್ಪಕ
ಒಂಟಿ ಬದ್ಕ್ ಮದೀಂದಾಚಿ ಕೆಯ್ವು ಕಯತಾಪಕ |
ಪಕ್ಕತಿಂಜ ಬೆಂದುವಳು ಮೆಲ್ಲೆ ಮೆಲ್ಲೆಪರಂದತ್
ಉಳ್ಳ ಒರ್ ಮೋವಂಗ್ ಮಂಗಲ ಕೈಂದೆಣ್ಣಾಚಿ ||೨||

ಚಾಯಿಕಾರ ಮೋವೊಕಂಡ್ ತಂದ್ ಬೆಂದುಕಾಯಿತ್,
ತಂದ್ಕಾರ ಮನೆಕ್ ಬಂದ್ ತಕ್ಕಾಬಾಕ್ ಪರಂದತ್ |
ಗಣ, ಕೂಟ, ಮನ ಎಲ್ಲಾ ಒತ್ತ್ ಬಕ್ಕಂಡುಂದೆಣ್ಣೆತ್
ಅನ್ನನಿನ್ನನೆಂದೆಣ್ಣೆತ್ ಆರ್ ತಿಂಗ ಕೈಂಜತ್ ||೩||

ಕಡೆಕ್ ಒರ್ ಚಾಯಿಕಾರ್ತಿ ನಾಡ ಮನೆಕ್ ಬಂದಿತ್,
"ಮಾಮಿ"ಂದೆಣ್ಣೆ ಕಾಲ ಪುಡ್ಚಿ ಮನತಿಂಜತ್|
ತಕ್ಕಾ ಬಾಕ್ ಪರಂದ್ನೋಟಿ ಅಡ್ಕಕಂಡ್ ಮೆಚ್ಚಿತ್
ಚಾಯಿಕಾರ ಮೋವಗೊತ್ತ ಬೋಜಕಾರ್ತಿ ಪೊಣ್ಣಂದ್ ||೪||

ಮೂಡಿ ಕುಂಞಿ ಮೈಮಂಗೆಲ್ಲಾ ಎಚ್ಚರ ಪರಂದತ್
ನಾಡ ಮನ ದುಂಬಿತಿಂಜ ಚಾಯಿನ ನಾ ಕೊದ್ಚಿತ್
ಬುದ್ಧಿ ಎಣ್ಣೆ ಮೊಂವಂಗ್ ನಾ ಮಂಗಲಕ್ ಒತ್ತತ್.
ತಕ್ಕ ಬಾಕ್ ಪರಂದ್ ನಂಗ ತಂದ್ಬೆಂದು ಮಾಡ್ಚಿ ||೫||

ಮಂಗಲಾನ ಒರ್ ತಿಂಗತ್ ಮೈಮಡ ಚಾಯಿ ಅರಂಜತ್
"ಅವ್ವ"ಂದೆಣ್ಣೆ ಆಸೆಲಿಂಜ ಮೋಂವ ತಿರೀತ್ ನಿಂದತ್ ||
ಮೆಲ್ಲೆ ಮೆಲ್ಲೆ ತಕ್ಕಬಾಕ್ ಕಮ್ಮಿಮಾಡಿ ನಡಂದತ್
ಆರ್ ತಿಂಗ ಆಪಕ ಬೋರೆ ಮನೆ ಮಾಡ್ಚಿ ||೬||

ಸಾಮನೆಲ್ಲಾ ಕೆಟ್ಟಿ ಬಲ್ಚಿ ಪೋರಟ್ನಿಂದಿತ್ತೆಣ್ಣೆಚಿ,
"ಅವ್ವಾ! ನಾಕ್ ಎಕ್ಕಲೂ ಬಸ್ಸಲ್ ಪೋಪಕಾಪಾಲೆ||
ನಾನು, ನಾಡ ಪೋಣ್ಣ್ ಕೂಡಿ ಪೇಟೆ ಮನೆಲ್ ಬದ್ಕವಾ
ನೀಕ್ ಬೋಂಡ್ಯ ದುಡ್ಡ್ ಕಾಸ್ ಅಯಿಚಿತಂದಂಡ್ ಇಪ್ಪಿನಾ||೭||

ತಕ್ಕ ಕೇಟ ಅವ್ವಂಗ್ ಮಂಡ ತಿರಾನನಕೆ ಆಪಕಾ,
"ಬೋಂಡ ಕುಂಞಿ, ಬಯತ್ ಕಾಲ ಒಂಟಿ ಬದ್ಕ ಕೈಯ್ಯಲೆ||
ಮುದಿ ಮಾಯಿರ ತಕ್ಕ ಕೇಟ, ಕೊದಿ ಮೈಮ ಎಣ್ಣ್ಚಿ
ಕಳಿ, ತೆಳಿ, ಚಾಯಿ ಬದ್ಕ ಕೊದ್ಚಿಯೇ ನಾ ಬಂದೆನೋ ||೮||

ತಕ್ಕಕೇಟ್ ಮಾಯಿರ ಕಣ್ಣ್ ದುಂಬಿ ಬಪ್ಪಕ
ಪೋರಟ್ ನಿಂದ ಮೋಂವೊ ಮೈಮ ಕಾಂಗತಾಚಿ ಕಣ್ಣ್ಕ್
ಬೋಳ್ತ ತೋಲ್ ಕೊದಚನಾ ಗುಣಕ್ ಬೆಲೆ ಕೊಡ್ತಿಲೆ
ನಾಡ ಬಯತ್ ಕಾಲತ್ ಒಂಟಿ ಬದ್ಕ ಆಚಿಲಾ ||೯||

ಕಣಿ ತೊಪ್ಪ

ಕಣಿತೊತ್ತಿರಾ ನಿಂಗ ಕಣಿ ತೊತ್ತಿರಾ

ತಾಮನೆ ಮೋಳಿಯಳ ನೆನೆತಿತ್

ಕಣಿ ತೊತ್ತಿರಾ ನಿಂಗ ಕಣಿ ತೊತ್ತಿರಾ

ತೊಲೆಯಾರ್ ತಿಂಗತ್ತಲ್ ಚಂಗ್ರಂದಿರಂದ್

ಕುಲ ದೇವಿ ಕಾವೇರಮ್ಮೆನ ತುದ್ ಚಂಡ್

ಫಲತರ ತರಕಾರಿ ಸುತ್ತ ಬೆಚ್ಚಿತ್

ನಡುಮಧ್ಯ ಭಾಗತ್ ಪಾನಿನೆಲ್ಲ ದುಂಬಿ

ಮೇಲೆ ಸೇರ್ ತುಂಬಿ, ತಳಿಯಕ್ಕಿನೋ ದುಂಬಿ ||ಕಣಿ||

ಕೋಳಿ ಕೂತ್ ಕ್ ಮಿಂಞ ಪೊಮ್ಮಕ್ಕಳು ಎದ್ದಿತ್ |

ಕುಳ್ ಚಿ ತಳ್ ಚಿ ಎಲ್ಲಾ ಶುದ್ ಮುದ್ದಿಕ್ಕೇಲ್

ನಾ ಮಿಂಞ, ತಾ ಮಿಂಞ್ಲಂದೆಣ್ಣಿಯಂಡ್

ಐನ್ ಮನೆಕೆಲ್ಲರೂ ಓಡಿಯಂಡ್ ಬಂದಿತ್ ||ಕಣಿ||

ಕಾವೇರಿ, ನಂಗಡ ತಾಮನೆ ಮೂಡಿ

ನಂದಾಯಿ ಚಾಕ್ ವ ಅವ್ವನಾಯಿತ್ ನಿಂದ್ |

ಲೋಕ ಜನತ್ತರ ಪಾಪ ನಾಡ ಮಂಡೆಕ್ಂದೆಣ್ಣಿ

ಪೊಳೆಯಾಯಿ ಪರ್ಂಜ ದಿನ ||ಕಣಿ||

ನಟ್ತ್ಯ ಬೊಳಂದ ಬೊಳೆಕೆಲ್ಲಾ ಕಾತಾಯಿ ನಿಪ್ಪೀಂದ್
ಭಾಷೆ ತಂದಿತ್ ನೀನ್ ನೆಮ್ಮದಿಲ್ ಚಾಕ್ಂದ್
ದೋಸೆ ಮಾಡಿತ್ ಮೇಲೆ ತೆಗೆ ಪೊಳಿ ಬೆಚ್ಚಿತ್
ಬೊತ್ತ್ ಕುತ್ತಿ ನಿನ್ನ ಬೋಡಿಯಂಡ್ ನಂಗ |

ಕಾವೇರಿ ಕುಳಚಿತ್, ತೀರ್ಥ ಕುಡ್ಚಿ ನಂಗ
ಪಾಪಕರ್ಮಯೆಲ್ಲಾ ಪರಿಹಾರ ಮಾಡಿಯಂಡ್ |
ತೀರ್ಥಕೊಂಡ್ ಬಂದಿತ್, ನೆಲ್ಲಕ್ಕಿಲ್ ಬೆಚ್ಚಿತ್
ನಿನ್ನ ನೆನತಿ ತುದ್ಚಿತ್ ಕೊಂಡಾಡ್ವ ನಂಗ ||ಕಣಿ||

ನೆರಿ ಬೀಜಿ ನಡಂದಂಡ್, ತಾಮನೆಕ್ ಬಂದಿತ್
ಕಣಿ ತೊತ್ತ್ ಕಾರಣನ ಕೋಂಬರೆಲ್ ಕಂಡಿತ್
ಅರಿಯಯಿಂಡ ಪೆರಿಯಯಿಂಡ ಕೈಕಾಲ್ ಪುಡ್ಚಿತ್
ವಾರಾಂಡೆಕೋರಮ ತಾಮನೆಕ್ ಬಂದಿತ್
ಅವ್ವನ ಕೊಂಡಾಡಿ ತುದ್ಚೆಂಡ್ ಕೊದ್ಚೆಂಡ್
ಕಣಿ ತೊತ್ತ್ ನಂಗ || ಕಣಿ ತೊತ್ತ್ ||

ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ, ಮಡಿಕೇರಿ



ಅಧ್ಯಕ್ಷಿಣಿ

ಶ್ರೀಮತಿ ಉಳ್ಳಿಯಡ ಡಾಟಿ ಪೂವಯ್ಯ

ಫೋನ್: 08272 : 229074 (ಕ), 229178 (ಮ), 9845097500 (ಮೊ)

ರಿಜಿಸ್ಟ್ರಾರ್

ಶ್ರೀಮತಿ ವಿ. ತಾರಾಸರಸ್ವತಿ

ಫೋನ್: 08272 : 229074 (ಕ)

ಸದಸ್ಯಂಗ:

ಶ್ರೀ ಮುದ್ದಿಯಡ ಕುಶ ಪೊನ್ನಪ್ಪ	☉ 08274 : 255893 (ಮ)
ಶ್ರೀಮತಿ ಕೂಪದೀರ ಸುಂದರಿ ಮಾಚಯ್ಯ	☉ 08272 : 229580 (ಮ)
ಶ್ರೀಮತಿ ತೀತಿರ ರೇಖಾ ವಸಂತ	☉ 08274 : 244406 (ಮ)
ಶ್ರೀ ಕಾಳಮಾಡ ಎಂ. ಮೋಟಯ್ಯ	☉ 08274 : 249387 (ಮ)
ಶ್ರೀ ನಾಗೇಶ್ ಕಾಲೂರ್	☉ 08272 : 265658 (ಮ)
ಶ್ರೀ ಬೊಟ್ಟೋಳಂಡ ಕಾಶಿ ಅಜ್ಜಯ್ಯ	☉ 08272 : 224240 (ಮ)
ಶ್ರೀ ನಾಣಮಂಡ ವೇಣು ಮಾಚಯ್ಯ	☉ 08274 : 234276 (ಮ)
ಶ್ರೀಮತಿ ಪಾಲೆರ ರಾಣಿ ಅಪ್ಪಣ್ಣ	☉ 08272 : 230728 (ಪಿಪಿ)
ಶ್ರೀ ಹೆಚ್. ಮಂಜು	☉ 9448326032 (ಪಿಪಿ)
ಶ್ರೀ ನಾಳಯಮ್ಮಂಡ ಉಮೇಶ್ ಕೇಜಮ್ಮಯ್ಯ	☉ 08274 : 231721 (ಮ)
ಶ್ರೀ ಕಲಯಂಡ ಪಿ. ಅಯ್ಯಣ್ಣ	☉ 08272 : 237708 (ಮ)
ಶ್ರೀ ಬಡ್ಡೀರ ಎ. ಸುಬ್ಬಯ್ಯ	☉ 08276 : 274207 (ಮ)
ಶ್ರೀಮತಿ ಮುಕ್ಕಾಟರ ತಂಗಮ್ಮ ಉತ್ತಪ್ಪ	☉ 08276 : 275401 (ಪಿಪಿ)



ಬಡಕಡಮ್ಮಂಡ ಕಸ್ತೂರಿ ಗೋವಿಂದಮ್ಮಯ್ಯ

ಬಡಕಡಮ್ಮಂಡ ಗೋವಿಂದಮ್ಮಯ್ಯಂಡ ಪೊಣ್ಣೆ. 39 ಕಾಲ ಉಪಾದ್ರಿಣಿ ಚಾಕಾರಿ ಮಾಡಿತ್. ಕನ್ನಡತ್ ಎಂ.ಎ. ಪದವಿ ಪಡ್ಂದಿತ್. ಹಿಂದಿ ಭಾಷೆಲ್ ವಿಶಾರದ ಪರೀಕ್ಷೆ ಪಾಸ್ ಮಾಡಿತ್. ಚೆನ್ನ ಕಾಲ ಹಿಂದಿ ಉಪಾದ್ರಿಣಿಯಾಯಿತ್ ಕೆಲಸ ಮಾಡ್ನ ಅನುಭವ. ಕನ್ನಡ ಪತ್ರಿಕೆಲ್ ಪಲತರ ಎಳ್ತ್ ಪ್ರಕಟ ಆಯಿತ್. ಅಲ್ಲತೆ ಕವಿಗೋಷ್ಠಿ, ವಿಚಾರ ಗೋಷ್ಠಿಲ್ ಭಾಗವಹಿಸಿತ್. ಆಕಾಶವಾಣಿ ಪಿಂಞ ದೂರದರ್ಶನತ್ ಕೊಡವ ತಕ್ಕ್ಲ್ ಕವನ ಓದಿತ್. ಇಕ್ಕ ಚಾಕಾರಿಲಿಂಜಿ ನಿವೃತ್ತಿಯಾಯಿತ್. ಮಡಿಕೇರಿಲ್ ವಾಸ ಉಂಡ್.

ವಿಳಾಸ : ಕಸ್ತೂರಿ ಗೋವಿಂದಮ್ಮಯ್ಯ
ಮನೆ ನಂ. 173
ನ್ಯೂ ಎಕ್ಸ್‌ಟೆನ್‌ಶನ್
ಮಡಿಕೇರಿ - 571 201